

摘藻堂四庫全書薈要

集部

欽定四庫全書蒼要卷一萬四千一百九十九

集部

安陽集卷二十四

宋 韓琦 撰

表狀

代三司謝賜內藏庫絀絹表

臣某等言准中書門下牒今月八日詔勅伏蒙聖慈於
內藏庫特支撥絀絹二百萬疋賜三司者禁財中發實
出於上仁邦計外充蓋無於私積恩頒下及慶悚交深

中謝竊以乘用之宜聿歸司會經費之度咸出縣官惟
賦調之有常或荒災而致乏爰崇上術允屬熙辰恭惟
尊號皇帝陛下執粹凝圖寶慈惇治茂輯寧人之務
精窮觀化之原修八政以厚生遐稽往詒愛十家而興
儉奠軼前徽式是先猷存諸內府量彼地征之入收其
歲取之餘非主羨贏本期均節向以農疇失稔聖慮通
權荐捐國帑之珍俾濟公家之急故得高宮監善協氣
開祥坐還富庶之風允洽登平之望而猶豐凶在念損

益求中戒牟利以傷苛貴寬民而與足誕宣優詔垂察
攸司載蠲繒帛之饒更助歲時之給仰出綸之施惠在
罄宇以蒙休臣等備位天臺尸官計部秋毫析利罕詳
經世之謀春澤流恩徒樂阜民之化敢不增研心畫祇
佩官箴彌脩底謹之方益究懋遷之理冀陳薄效少答
鴻私臣無任

謝知制誥表

臣某言伏奉制命特授臣依前起居舍人知制誥者青

蒲獻議曾微補衮之勤黃闈程文俄玷演綸之任省譟材之無狀顧成命之已行荷寵兼常撫躬增勵中謝竊以禁扃清切居官為榮帝制坦明作訓攸重向非機靈敏給才辯高奇善循四禁之規雅擅一時之譽則何以徊翔近掖宣暢鴻猷雍容侍從之聯振復典謨之體宜甄時望以協朝僉如臣者緒迹至孤器姿無取幼奉楹書之誨早親童篆之工幸對聖期復玷辭等藩條關決罔詳施教之宜儒館並游寢被育材之化擢贊尹京之

治易參司會之煩首公則勞稽效誠寡庖鋒不振奚彰
批竅之能阮族甚貧遂有出麾之志輒露抗章之請方
諧為郡之行伏遇尊號皇帝陛下開道求言勵精修政
俾傳使竹之授留責諫囊之忠越被恩升力思毘益每
弗虞於禁忌始自竭於愚駕物論皆危天意無忤建歲
勞之三易微穴見之一長豈謂聖度包荒宸襟采善俾
沿科選之舊進居辭職之崇躍龍鳳之池巫塵清貫漸
鴻鸞之黨榮厠寵班敢不磨鈍忘疲修方匪懈誥令之

出勉追深厚之風名節所持靡蹈諛邪之徑庶盡捐軀
之報仰酬當宸之仁臣無任

謝降御前劄子表

臣某言遞中降到御前劄子二道伏蒙聖慈以近為賊
犯渭州山外亡失主將具狀待罪許臣別圖來效以刷
前恥者敗軍有法本不期貸責效以恕使得盡死中謝
伏念臣識暗經遠才屈任重偶以童蒙末技優竊科等
幸遇天下無事方垂徹警專修俗吏之業罕究兵家之

學屬以羌落背惠王師興伐朝廷用不求備俾參西略
臣自念狂賊桀驁邊民被毒人無愚知奮身願效況臣
粗識忠義能不憤激故受命引道無敢固辭赴職以來
朝計夕慮思有所立上寬聖懷以至馳奏廷中方授成
算還趨塞上亟整師屯而允渠併兵親犯隴外臣素料
其至先集衆軍猶慮勢分遣其齊進不謂諸將恃勇致
此敗覆雖指縱可驗似不愧心而職事有隳理當請罪
伏蒙尊號皇帝陛下燭幽垂察含垢示慈謂李廣數竒

非由失計孟明三敗終能贖過荐頒溫詔許竭後勤臣
敢不嘗膽以思枕戈自勵劇寇尚在豈還朝之可期素
志未伸庶捐軀而後已臣無任

謝復官表

臣某言九月二十七日樞密院遞到告敕各一道伏蒙
聖慈授臣起居舍人者謀軍而敗獲罪當然使過以恩
勸功斯在寵光所暨媿慄無從中謝伏念臣稟賦顛庸
緒迹寒替偶緣末學誤中甲科驟歷榮階繼塵劇任奉

身以直居職惟公逐巧者目為愚夫養高者謂之俗吏
出於聖監擢備諫員荷寵既深獻誠必盡屢刺權豪之
失不虞家族之危仰恃含容僅逃放逐逮易官於注筆
旋書命於詞垣自右蜀告饑高奴覆將荐驅使傳親諭
國靈有利輒言無疵不去所期還闕少遂息肩朝廷以
未殄賊巢方開帥府進預樞機之直俾參經畫之權雖
兵旅之宜素非習練而人臣之節當冒險艱拜命引塗
忘軀徇難周旋邊徼蒙犯雪霜薦賞武材則罷懦者皆

忌激揚忠憤則苟且者如讎一昨平涼之西首虜來寇
臣聚師以待定謀而行偏校爭先弗遵於節度衆寡莫
敵終及於撓亾讒胥競搖怨府交發諍臣論事亦謂當
誅宸眷念勤獨明非謬止從削秩尚委典城惟茲天水
之雄式控隴關之要氏羌雜處輿賦甚繁臣寢不及時
食忘其味力圖後效勉贖前辜重裘禦寒姑自修而作
誠積毀銷骨實衆口之未平不謂睿聽通微宸襟錄舊
特申昭洗亟復舊聯顧蕞質之再生諒煩言之寢弭斯

蓋伏遇尊號皇帝陛下體天育物以器任人謂獵犬無功匪自指縱之誤覆盆委照遽聞日月之明庶令負釁之臣得遂棄瑕之用敢不精研策慮謹布教條明斥堠以謹邊勵貌貅而禦侮收桑榆之木或振翼之可期竭犬馬之誠誓填壑之為報臣無任

謝轉官充秦鳳路經略安撫招討使表

臣某言十月二十日馬遞到告勅各一道伏蒙聖慈特授臣尚書禮部郎中依前充樞密直學士知秦州兼秦

隴州鳳翔府階成州路馬步軍都部署兼經略安撫沿邊詔討等使者秩進儀曹任專閩寄寵靈不次震慄無從中謝伏念臣稟識至卑賦才甚短早緣薄技濫竊儻科巫踐顯途力陳拙效徒能辦職本不知兵屬羌落之背恩命王師而興伐俾參戎略猥貳帥權慙無制勝之謀終抵敗軍之罪貶官以勸尚獲保邊垂障盡勤遽叨復職方思策勵少謝矜全豈謂廟算更張塞垣分制重遷官次增峻使名荷委注之至優懼虛辱之不振此蓋

伏遇尊號皇帝陛下本仁御俗貴恕使臣謂驚蹇之材
或期於遠到庶朴忠之節可責於後圖遂此甄升許其
輸盡謹當博訪碩畫講求善經明賞罰以御軍濟恩威
而撫俗異樹涓埃之績仰酬旒宸之私

謝改觀察使表

臣某言今月九日樞密院遞到告勅各一道伏蒙聖慈
授臣前件官者當兵旅之任姑欲正名付庶察之權誠
非稱職被恩不次以榮為憂中謝竊以帥十國而為連

蓋資屏翰長萬夫而觀政宜拔英豪儻容濫居曷濟國
事伏念臣以儒承業以文干用偶預儻選擢亞舉首恥
緣科級坐取貴塗凡隸官曹絕去苟且以至參京邑之
劇贊泉刀之繁諫署竭愚詞披書命處身必以其道出
言不敢及私心切愛君遂忘於已禍性專任直弗虞於
衆嫉屢犯禁忌久當放流時人甚危聖意彌簡而自凶
渠背惠西府置官不圖妄庸亦備推擇驟進直樞府俾
參畫於戎事夙夜以報庶揚天聲偏佐之專卒墮虜計

尚徙邊而薄罪徒補過以盡勤惟秦之雄為塞甚重控
制六郡羈屬雜羌旁扼寇衝俯臨闕要臣但能招懷種
落訓戢營屯起城壘以安人平獄市而清訟斥候斯謹
備豫必周為術固疎責實安在朝廷既已遷復官次增
重使名臣之非才大越涯分不謂薦膺異數益峻寵階
即為治之本邦委觀風之茂寄私門胥慰物論稱優此
蓋伏遇尊號皇帝陛下若古宣猷宜人開化究弛張之
大體恢緩御之遠略致茲頑朽繼荷采甄重念臣素非

將家早塵詞等平進之漸往式具存誠以疆鄙未安忠憤攸激力冒艱險志平僭狂顧軀命之可捐豈資品之為較奪鳳池而不賀前哲堪嗤刺豹庭之無功羣言是恤惟祿廩之加厚非寒素之所貪敢不精練武經日求勝算指縱加審扞防必嚴與賊俱全是焉深愧為噲等伍烏敢自羞或稍著於微勞願特還於舊物誓堅死節仰答宸私臣無任

謝賜詔書示諭表

臣某言樞密院遞到詔書一道伏蒙聖慈諭臣已除本
州觀察使且從廩秩之優益慰戎行之望者成命之行
庶乎開曉溫言以及賁若龍光惟素志之所存懼清衷
之未悉敢茲陳露良切震兢中謝伏念臣早以藝文妄
干祿仕幸遇尊號皇帝陛下首臨軒陛優擢科名序進
之階前規盡在而臣乃情吏事盡力公家自結聖知了
無私援一昨羌酋背義帥府須才誤置選中即馳塞下
經畫遷延通踰三期為國之謀固無云補在臣之分亦

用傾竭鄉膺督護之任已明委注之隆不期霈恩又出
非望驟易樞廷之直俾分連帥之權臣授寵無名撫躬
自度不敢遠稽典故上瀆睿聰竊記陛下纂極以來此
例甚少李維李士衡以老疾榮俸陳堯咨以侈性尚豪
並遭遇承平各充其欲故議者惜臣茲授謂匪美遷臣
但以處不避汚事上之節讓而就賤守道之常當朝廷
憂邊之秋非臣下擇官之日辭之則有可疑之迹投希
求進用之嫌授之則有從權之名協軍旅稱呼之便况

國家推公興治任人有次必不令臣永沈武列老於疆
垂或薄效之可甄宜舊物之來復臣是以難於拒免泰
然居職今承詔諭之意專示廩秩之優緣臣清白奉身
出於門法宣牽豢養之厚自損名節之高茲為伍於冗
流冀同心於外禦伏望皇帝陛下考勸功之法擴知臣
之明察臣甘去近聯主於恭順謂臣即當重祿靡在貪
號食儻一辨於愚誠誓愈堅於忠報臣無任

辭免諫議大夫表

臣某言今月九日三班借職趙九臯齋到官告勅牒各一道伏蒙聖慈授臣樞密直學士右諫議大夫者萬樞之府更直為榮七諍之班在官惟重厠舊聯而甚寵當新秩以無名理有未安讓非敢飾中謝伏念臣早繇孤直誤記聖衷粗幹米鹽之煩本無軍旅之學而自勉膺中詔來捍西垂三載于茲寸功莫就雖天仁所覆姑務貸全而疆事不修何施面目惟徇忘身之節絕萌干進之心向奉制玉就更廉印從權為便稱職誠非辭避靡

諧塵竊增愧一昨寇侵鄰道移督援師徒號萬兵之行
無及一毫之助遂使國威重挫虜氣益驕蓋臣不能乘
間襲歸應機取勝上軫旰宵之慮合從斧鉞之誅豈謂
伏蒙尊號皇帝陛下過采虛聲亟申褒典顧敗軍之若
是豈行賞之為宜孰可自欺固有公議重念臣爰從郎
署獲改使名幸近職之已還異前官之並授儻加異數
實奈彝章伏望皇帝陛下念邊鄙之未寧謂沮勸之當
謹止復禮曹之命特停省諫之遷如此則掎角禦戎更

求於實效糜捐報國益勵於愚衷其所賜告敕臣未敢
進納干冒旒冕臣無任

涇州謝差中使宣諭表

臣某言今月九日入內內侍省內侍殿頭李允亨至伏
蒙聖慈傳宣為日近差除兩地臣僚未差除間已指揮
中書劄記候將來邊事稍寧詔卿用在兩地非擬儀亦
非臣僚奏舉特出朕意宣諭卿知兼令臣密舉臣僚代
臣邊任者聖眷特深將圖不次之用臣愚屢省竊懷失

職之憂於義當陳斯言敢妄中謝伏念臣西畫疆事於
今累年雖勵敢為之心曾微必勝之效偏裨失律既有
罪而不誅援助發兵復無功而被賞尚畀中權之峻仍
兼四路之崇恩重報輕任隆材譎捐軀以義乃身高氏
斧之秋歸闕何顏絕生入玉關之望豈謂伏蒙尊號皇
帝陛下仁惟及遠道本推公因弼臣拜命之初念窮塞
宣勞之久密加寵諭前許近司斷自清衷不緣他議顧
蒙鄙之榮而良厚於國家之慮則非長蓋以逆吳約和

未分誠詐宿師經戰僅起瘡痍臣與范仲淹日極謀惟
粗詳方略願少寬於銜勒得自竭於歲時庶能施尺寸
之勤上以副朝廷之寄如其禦戎無狀曠日為虞則乞
擇材傑之臣使之為代明竄殛之典以警在邊臣固不
敢先自舉官涉于希進唯幸高明之鑑俯務切至之誠
臣無任

賀皇子降生表

臣某言伏覩進奏院報皇子降生者穹昊垂休元良載

誕累盛之期增赫重暉之采采光凡在幅員率同慶躍
中謝伏以尊號皇帝陛下睿明正統兢翼凝猷紹三后
之不基覽八紘之洪緒盱宵求治勤儉化民果聖嗣之
寢昌示璿源之滋衍吹銅導氣式協於嘉辰齒胄從師
即成於懿德永扶天業克耀儲闈臣恪守窮邊竊聆熙
事預班朝之列莫趨交戟之嚴輸就日之誠徒效傾葵
之意臣伏限官守在遠不獲蹈舞闕庭臣無任

遷葬求郡謝賜批答不允表

臣某言伏蒙聖慈以臣上表陳乞知相州或近鄉里一
郡躬親營護墳域特降詔旨不允許臣襄宅有期即當
暫往者請郡以奉先塋雖違素願賜告以護親葬亦示
優恩粗安人子之誠特出聖宸之惠中謝伏念臣鄉繇
睿選擢貳樞庭方圖報以盡勤敢求安而自逸蓋以早
從稚歲二親則亾暨竊榮階諸兄繼謝比緣西事久在
兵間顧封樹之未諧每肺肝之如割逮塵重任正偶利
年尋得地於故鄉已涓辰於遠日臣嘗私自省度至于


再三視轎車而弗親行實孝心之不忍處近位而求便
假必物議之有云與其貪寵以抑情孰若避賢而申志
是以輒由衷而露奏冀解職以為藩宣謂伏蒙尊號皇
帝陛下念進退之匪輕欲公私之克濟曲頒綸詔親諭
玉音俾襄事之如期即馳騶而暫往感深存歿榮耀措
紳敢不砥節愈堅挺身思奮他人之憚行者臣不憚他
人之難言者臣必言儻犬馬之未先誓糜捐而無避臣
無任


安陽集卷二十四

謹案卷二十三第五頁後五行冠于首篇刊本首
訛昔今改

卷二十四第八頁前六行私門胥慰刊本私譌和
今改

第八頁前七行宜人開化刊本開譌聞今改





總校官庶吉士臣侍朝

校對官庶吉士臣陳崇本

謄錄監生臣王以謹

欽定四庫全書薈要

集部

安陽集卷二十

五至
八

詳校官助教臣常循



欽定四庫全書舊要卷一萬四千二百

集部

安陽集卷二十五

宋 韓琦 撰

表狀

揚州謝上表

臣某言伏蒙聖恩授臣資政殿學士知揚州事已於四月五日到任上訖臣繆參樞筦無補盛明人言已騰君量猶恕祕殿之資甚寵廣陵之寄絕優過爾被恩得無

懷愧中謝伏念臣朴忠守道天賦難移孤直任真聖知
有素常以親逢亨運早廁清塗不宜因循以負驅策屢
膺煩劇之任偶逃罷軟之譏自元昊僭狂西垂震動乃
承人之薦領帥權雖無成功實盡死節不意曲矜久次
擢忝近司固讓莫諧竭愚思效凡陳鄙議皆出至誠慮
邊計則冒朋黨之疑斷國論則恥依阿之說會愷人之
肆忿窺時事以興誣爰從親葬之還獲視篋書之謗既
詳矯妄因得指陳願付宰樞示於臺諫閱茲虛罔之狀

即驗中傷之情臣自以叨備臣鄰乃來詆訾不可更塵
重任有玷公朝尋伏私居乞行顯罷伏蒙尊號皇帝陛下
察無他過尚錄舊勤深惟進退之間必存堂陛之體
俾兼美職出守便藩舟楫安流決旬受署重念朝廷求
治疆鄙僅寧臣內不能協贊籌帷精講致平之策外不
能周旋塞壘力營預備之謀而乃宴處名城坐尸厚俸
庇親自足臨政少憂於臣身則粗安在臣志則未報敢
不導宣寬詔慰撫編氓米鹽之務必親獄市之繁無擾

士師當黜固枉道以弗為即墨免烹諒毀人之終辨誓
稟不渝之操仰酬惟睿之仁

謝轉給事中表

臣某言今月二十七日進奏院遞到勅牒一道官告一
通伏蒙聖慈授臣給事中仍放朝謝者官以歲稽雖存
著令賞非功懋曷弭羣言引讓則取疑於未成受命則
不勝其多愧惕焉屢省莫知所安中謝伏念臣幸偶聖
朝早塵科等常恥養高而圖貴近每願竭節以報國家

周旋俗吏之為激切諫囊之論不虞擯斥蓋恃聰仁以
至去禁掖而即邊戎捨儒冠而服武弁唯殫千慮異緩
憂勞敢有一言輒辭危難逮羌人之送款承召節以來
朝擢貳機繁無容懇避愛上之心愈篤忤時之咎寢彰
尚賴保全許均優逸自膺淮海之任實居吳粵之衝城
閑隙殘姦訛固結既思繩葺必務躬親常人所非則曰
未詳大體微臣自視可以少贖素餐僅涉再期率無治
狀豈謂伏蒙尊號皇帝陛下擴天地之量錄日月之勞

申舉舊章進升寵秩拜於瑣闥更視深嚴刺以貂庭重
貽嗤謂敢不動思合道守不易方惟忠義之所存在始
終而一致期於效死庶可酬恩臣無任

揚州謝賜曆日表

臣某言伏蒙聖慈賜臣慶曆七年御製崇天萬年曆一
卷者臣聞古諸侯受天子之朔必歲諸祖廟月用籒羊
之禮告而行之所以謹王正而重民事也國家統一區
夏治厯惟精以時頒宣率土奉順中謝恭惟尊號皇帝

陛下則二儀而著典協四氣以行令親垂聖訓布于萬
方臣任忝列藩欽承大法敢不敷明上意以勸境內使
民知龍見日至之次東作西成之期用洽和平式符化
育臣無任

賀鴻慶宮奉安三聖御容禮畢表

臣某言伏覩南京鴻慶宮奉安三聖御容禮畢者商丘
之地王業所興乃迹舊規以新原廟圖三后顯昂之表
申四時怵惕之懷熙事克成普天同抃中謝伏惟尊號

皇帝陛下以唐堯之仁睦親族以虞舜之孝事祖宗道
格至平民知大順而猶慮列聖之游有所未奉盡物之
薦有所未虔經制或隳清衷是念乃眷別京之重實惟
開國之基靖館夙嚴睟容攸宅再謀宗葺式示欽承儻
功之初展禮咸備事遵簡約本達於至誠天之監臨宜
輔於盛德臣限拘官守不獲奔赴闕庭臣無任

鄆州謝上表

臣某言伏蒙聖慈就差臣知鄆州軍州事已於今月五

日到任上訖須句重地為國東屏宜擇名臣宿望委之
鎮臨輕付非才懼不勝任中謝臣聞人之所稟也非大
賢哲不得其全故黃霸長於治人及入為輔弼則風烈
衰焉何則材有所偏而用有所適也是以聖王在上馭
臣布職必以器而使之伏念臣樸慳鄙陋無一可取徒
識忠義自謂難奪迺者處繁劇備邊瑣效死以報或有
塵露之益豈謂伏蒙尊號皇帝陛下特加憐察謂可倚
任擢在樞府預聞國議臣不敢渝其所守愈思自竭而

識闇才拙動取乖忤宜從擯黜復何矜全治揚二年乃
免過咎尚承恩記移此便藩臣已舉家乘舟由清河路
不一月日直抵城下雖冒大暑不知其勞土風甚淳官
事亦簡在臣所得為幸實多昔賢治人之長非臣敢及
庶能宣朝廷寬大之詔令百姓知上意慈仁不使貪苛
之吏外瀆風化夙夜惟念以勤撫恤冀有補助少贖素
餐臣無任云云

成德軍謝上表

臣某言伏蒙聖慈就差臣知成德軍府事已於今月三日到任上訖東藩五月粗舉政條北道一麾亟更守任以忠則忘奔走之苦以才則誤寄責之深撫已一思慙汗交集中謝伏念臣從官素拙立朝至孤獨膺聖知遂玷樞近嚮諧補郡之逸益懋首公之勤而自滿歲淮南改州汶上顧日月之未幾亦吏民之頗安弗遑定居驟爾易地此蓋伏遇皇帝陛下軫守方之念推任舊之誠乃眷常山之雄實握全趙之勝將帥未明於紀律士卒

或稔於情驕付以懦庸俾之振葺狡免未死再圖獵犬
之勞謗虎本無已判市人之妄敢不究綏靖之理裁訓
戢之宜塞柝外嚴不忘於備豫邊囊入奏動審於事機
少分宵旰之憂庶有塵露之益臣無任云云

定州謝上表

臣某言伏蒙聖慈就差臣充定州路都部署兼安撫使
兼知定州軍州事仍降詔旨不許辭免已於今月十四
日到任上訖竊以中山控邊素號雄重地形坦易無坂

澤之阻先時虜騎入寇必趨是塗故國家常聚重兵擇
名將以制其衝自約和以來不忘備豫至於守帥之任
未嘗輕以屬人然而敵稔於因循兵驕於閑放聖慮經
遠赫然改圖當此之時臣謂宜得文武兼備之才使撫
靖而訓輯之不意猥以及臣臣退自省度懼不能副朝
廷寄責之重避讓莫獲無所措躬中謝伏念臣徒守朴
忠無他績效一辭樞柄三易郡符兢兢營職苟脫罪咎
豈謂伏蒙尊號皇帝陛下天地之度愛而全之念求舊

以惟人不使人而求備於北道更制之始首膺選用荷
恩誠厚量力固憂況今敵人講歡務悖大信經畫之
任最為難處凡百措置不可默然而或必振頽綱則張
皇之沮及遂仍故態則宴安之患深伏望皇帝陛下究
易調之原察理繩之漸少寬銜策俾盡驅馳事或建明
特加財察臣敢不外圖扞蔽中戢營屯動存機慮之先
或有萬一之補忘身徇國此臣夙心臣無任

謝賜禁中銀救濟飢民表

臣某言入內供奉官高懷政齋勅到州伏蒙聖慈支賜
禁中銀五千兩令變轉救濟闕食人民者天運難測固
有流行之災民食弗充上貽宵旰之慮不責大農之給
特疏中禁之財濟此殍荒出乎仁惻中謝臣聞堯水湯
旱非政之使然金穰木飢乃歲有常次故王者能察時
難阨閔俗困虛必裁救恤之宜遂亡捐瘠之苦伏惟尊
號皇帝陛下以憂勤嗣大業以約儉恢永圖德無遠而
不柔惠雖微而必決宜膺敷錫以格太寧而涉夏以來

苦雨為沴唯茲北道最失西成納隍深軫於聖懷振廩
重侵於經費即馳使指遠諭宸慈且頒內府之珍以續
醫桑之命天之肆虐方不堪其怨咨上所施恩已頓寬
於餓殍臣才非通敏任忝撫綏奉詔札之丁寧痛農疇
之乏絕敢不躬宣睿旨申誠屬封期共拯於疲羸使咸
知於愛育臣無任

謝賜詔書獎諭表

臣某言七月二十五日進奏院遞到詔書一道伏蒙聖

慈為去年河北艱食人戶流亡以臣孽畫拯救特賜獎
諭者北土之飢近歲未有非上之大恩過於天地則民
之衆命委諸溝壑顧守臣之所竭惟君命之是虔忽被
詔褒得無心愧中謝伏念臣賦才甚短為政少通自易
塞垣即逢水害流庸以死者皆是饘粥而濟者幾何洩
官廩以從權則文符之交戾破郡豪而取辦則城野之
俱空故於賑卹之方務適公私之便其利溥則或時而
冒禁所益衆則不敢以愛身職雖盡勤患且奚救幸遇

尊號皇帝陛下深惟邦本上惻睿慈以斯民未安為大
憂以經費少侵為末事德音一發罷悴頓蘇使傳交馳
慰存良厚訖蒙再造盡出至仁而臣任忝撫綏歲罹艱
厄莫副盱宵之念坐貽尸曠之羞敢謂聖度兼容宸聰
過聽特示璽書之勸蓋為邊鄙之光臣敢不載策薦孱
動思獎勗當此饑災之後更圖安集之宜使閭里之間
漸期復貫則疆垂之下自亦無虞稍脫罪誅茲為報塞
臣無任

辭免資政殿大學士第一表

臣某言今月二十四日三班借職劉仲舉齋到官告勅牒各一道伏蒙聖慈授臣依前官資政殿大學士仍賜對衣金腰帶鞍轡馬者聖人求舊時則推恩臣子叨榮固宜審分禮當必讓罪亦何逃中謝伏念臣立于朝廷粗有本末徒以朴忠而自信不虞世俗之多違自邇清光暨參密輔出一語則思於助治無一事有涉於進身寵祿未安每愧焉而懇避艱危所任必奮然而願行唯

聖則知非臣敢妄而況竭來朔塞僅越歲暮敵可慮而為策且迂民大歎而所活能幾上孤寄委日益羞慙豈謂伏蒙尊號皇帝陛下道貴函容愛深體貌特峻殿宸之職俾圖疆場之勤雖君賞所加欲示眷懷之厚而臣功何在豈無廉恥之思伏望皇帝陛下俯照孤心與全素節亟追成命以協至公如此則執二柄以御邦無傷勸沮存一心而報上更誓廉捐其告勅等見令差來使臣收管聽候指揮干冒宸嚴臣無任

第二表

臣某言近者伏蒙聖恩授臣資政殿大學士尋上表陳讓今准中書劄子奉聖旨不許辭讓者賞出無名讓期得請臣誠至激詔意未俞敢再犯於嚴誅冀必如於素志中謝伏念臣逢辰已幸圖報且輕苟在上知其用心使得盡力雖終身處以舊祿固足為榮況此守邊僅方踰歲都無績效可副旌疇竊惟河朔之間時乃饑災之後天之祐聖有意以寤于國家聖以答天最大者明乎

賞罰儻容叨越是紊經常伏望尊號皇帝陛下道本無
私治先有勸不以一臣之小愛而傷四海之大公特寢
誤恩以符清議使飾偽者聞風而自沮守道者知分而
獲安則疆場雖勞是甘於白首雪霜更厲不變於丹心
其所賜告勅今附遞進納臣無任

謝表

臣某言三班借職劉仲舉齋到官告勅牒各一道伏蒙
聖慈授臣資政殿大學士仍賜對衣金腰帶鞍轡馬及

奉聖旨不許辭讓者賞既優而未諭蓋省無勞讓雖至而復當固非獲已惟進退之難處在斯須而弗安中謝伏念臣才本無他志期有立常覽古人之忠義以至於涕零矧逢真主之聖明是堅於死報山海之大何益犬馬之誠則然故入贊樞機必乃情於萬務出居屏翰亦盡力於一方圖富貴宣臣之本心竊祿位是臣之深恥惟茲守塞僅甫踰年徒能革兵之墮驕無以救民之刑敝過為之慮動則幾於闊疎苟幸其安日可須於罪黜

豈謂伏蒙尊號皇帝陛下天地之度堯舜其仁謂內外
雖殊孰差於輕重簪履至賤尚惜於墜遺乃眷舊臣咸
均寵數不圖庸近亦玷褒榮重躋祕殿之聯實駭愚儒
之守避焉而弗獲其請受焉而莫得其名再叩慈宸則
有飾偽背時之謗遂塵美職則有無功冒進之譏與其
違衆而取嫌曷若被恩而思效偃僂承命慙羞在顏臣
敢不服夙夜之勤副國家之遇方垂無事奚由奮勇以
答君鼎鑊在前誓不臨危而變節臣無任

謝轉禮部侍郎表

臣某言今月十六日進奏院遞到勅牒一道官告一通蒙聖慈授臣尚書禮部侍郎加食邑五百戶仍放朝謝者禮成合宮澤被率土蓋興久墜之典則有非常之恩凡在庶工皆踰素望中謝恭惟尊號皇帝陛下法古堯舜致時成康以大孝奉乎祖宗以至誠答乎天地曠絕之儀罔不講吉蠲之薦罔不躬而猶慮孝有所未申誠有所未達乃訪總章之舊式因路寢之嚴享太微之精

兼盡報天之意配文考之聖參修事祖之勤建訖明裡
亟覃殊慶第錫官師之寵且推福祚之餘而臣竊守邊
遐荐懼歲饑駿奔率職既莫助於國容愛利及人曾未
寬於上顧不謂均禧之始亦膺進秩之榮當有位之交
歡理難獨讓揣無功而自訟內實多慙敢不益勵朴忠
勉驅駑猥疆垂效力雖終老以無辭旒宸知臣在殞生
而孰報臣無任

謝加觀文殿學士再任表

臣某言今月二十五日姪男太常寺太祝正彥齋到官
告勅牒各一道伏蒙聖慈授臣依前行尚書禮部侍郎
充觀文殿學士仍令再任及放朝謝者滿歲復留已示
寄邊之重議功無實何勝進職之優荷信任則義不可
辭拜光寵則愧無容地中謝伏念臣賦性專樸遭時盛
明過蒙仁聖之誤知惟恐忠義之不足二垂所效一紀
于茲挺然思報於國家倏爾已成於衰病究疆場之事
幾寢食之俱忘於進取之心固夢寐之無及矧此中山

之會最居北地之衝自分道而新睿圖以非才而叨帥
任當兵卒橫驕之後柔歲時凶歉之餘得不世出之賢
猶難訓治使甚愚者之慮奚足戢安遽越代期分甘公
黜豈謂伏蒙尊號皇帝陛下天無不覆器之使人念考
績之踰時貴守方之有法深惟古制莫重久官將垂經
遠之規寢革數遷之敝特申褒典更責後勤任不辭難
蓋推誠之所激讓非中理雖冒賞以無嫌敢不益謹備
虞動存綏靖俾吏民之愈信致師旅之增和生入玉闈

可謂前人之隳志心居魏闕不忘疎迹之愛君苟未挂
於吏文終有裨於廟勝臣無任

安陽集卷二十五

欽定四庫全書薈要卷一萬四千二百一

集部

安陽集卷二十六

宋 韓琦 撰

表狀

辭免武康軍節度使表

臣某言今日某官齋到告敕伏蒙聖慈授臣武康軍節度使知并州河東路經略安撫使兼并代等路兵馬都總管者守邊再閏久實何功申命廣朝寵斯為誤矧

元戎之寄重兼大鹵之地雄驩付匪才其如清議中謝
伏念臣守惟任拙性不通時徒知忠義之可為雖在顛
危而莫奪而自奮身西鄙待罪北疆周旋一紀之間勤
苦二垂之事積憂成瘁由壯得衰方欲上叩慈宸請更
便郡庶少全於生理願在備於死官豈謂伏蒙尊號皇
帝陛下度材之宜惟舊所任念一臨於朔部適五及於
歲暮載惟并晉之區並控羌胡之會俾專節度仍委撫
綏而臣素忝學儒粗能審分塞防之責既念重而難辭

旄鉞之來豈無勞之可愛自顧猶是羣言可知況今蠻
徼未賓王師致討欲人心之競捷在賞典之推公伏望
皇帝陛下察寸誠之不欺究二柄之當謹特追還於使
節止就頒於帥臺如此則名器不可假人免騰嗤誚爵
祿所以勵世足勸勲能幸知臣之至明期得請而後已
臣無任

第二表

臣某言云云者君恩一出猶愴改於已行臣分再思願

懇陳於當讓終期得請是免愧心中謝伏念臣早繇書
生久服武事豈貪愚有欲於利蓋忠憤不知其勞茲臨
朔垂再及歲閏務益煩而雖勉神過用而已疲方求便
安少養衰拙不謂誤膺聖念復責邊勤并土之控二疆
敢辭奔命洋川之抗六纛自省何功較其冒寵之必殃
不若避榮而獲戾伏望尊號皇帝陛下俯矜危憫謂出
至誠俾仍帥領之權且觀來效亟寢節旄之授以待勞
臣敢不强率虺孱愈圖報塞憂邊思職冀盡力於兵間

竊位素餐免致譏於天下臣無任

謝表

臣某言二月二十八日樞密院遞到詔書一道伏蒙聖
慈以臣陳讓武康軍節度使不允者寵若驚而自視其
實何勞讓如偽以雖誠固難俞請荷詔慈之加勛顧邊
責之匪輕於義莫辭措身無地中謝伏念臣進由孤直
知自睿明不敢苟富貴以作身謀唯以報國家而為已
任服西北二疆之事幾光陰一紀之間日有百憂官無

寸效不覺寒暄之易變但驚精力之早衰苟乘障以自
安亦未免好權之謗欲請藩而少便則涉乎避事之疑
夙夜以思進退不可宣謂伏蒙體天法道欽文聰武聖
神孝德皇帝陛下大度天地至仁陶唐念宿業之且勤
不責人於兼備就易帥臺於并上特加使纛於洋川荐
霈德音促當成命臣竊上循朝意再揣官宜十稔之前
嘗被察庶之寄三垂所次悉專督護之名今茲節制之
行始正營屯之任避焉莫得愧弗能勝敢不力究民疵

謹脩戎律義之所在知熊掌之難兼命或可捐若鴻毛
之甚易臣無任

并州謝上表

臣某言伏奉制勅授臣武康軍節度使知并州河東路
經略安撫使已於三月十七日到任上訖國家經畫三
垂實最他道置帥大鹵獨控二疆非有將略可以推敵
心吏術可以救民瘼或輕而授固不克勝中謝竊惟晉
陽之提封蓋本唐堯之舊化俗儉而家給土豪而兵勁

雖有水旱之沴而無凍餒之虞自西事之興屯戍茲廣
人疲遠餉戶及橫斂重以和糴積欠而輸窘姦錢亂法
而幣輕故令物力未甚完罪辟日以衆亭候無驚而兵
費猶冗羌胡久附而邊吏或懈伏惟尊號皇帝陛下以
恩德浸諸夏以威信柔外夷顧茲一方素號襟要思擇
帥守安而治之而臣信道雖篤應變不長乘障中山徒
歷再閏訖無實效上裨遠圖聖念於全未賜顯黜復加
旄鉞付此重寄詔旨悖諭弗容避辭臣敢不中夜以

興當食而廢審富庶之良畫較備禦之長筭使編氓曉
悉於上意殊俗震龍言於天聲若其報君之大方則當投
死而後已臣無任

乞知相州第一表

臣某言臣聞從事獨賢詩人所以興歎不能者止臣子所
以知難今引疾以訴天幸均勞而賜可中謝伏念臣天與
忠義仕逢聖明常行已存必至之心謂當時無難了之事
期以一身任天下之責九殞報君上之知見義必為所冀公

家之可濟其愚莫及不知世務之無涯故茲一紀之餘更
帥三垂之重或過中而食未及口或達旦而坐不得眠唯
憂材力之弗勝上孤眷倚不顧形神之過用易及衰疲以
至思苦傷肝氣留在脇自中年之俯及覺積疢之易搖比
歲以來垂隙屢作每妄攻而肆毒實無意以求生此者幸
遇尊號皇帝陛下臨遣國醫診知病本雖萬金藥劑之美
稍復支離而一道節制之繁誠難總決伏望皇帝陛下
廣天地至仁之造憐簪屨舊物之微知臣以憂職纏痾念

臣以過勞至憊許上武康之節退臨河亶之封深惟冒寵之災身願復亞卿之舊列使臣釋去重負全養至和訪經而衛生閱譜而調藥庶二三年之保攝得神幹之復完則西北邊之重難唯聖意之所任由衷所切得請是願臣無任

第二表

臣某言臣近以疾病上表乞守前官知相州一次伏蒙聖慈賜詔不允者病質圖安輒露辭煩之請詔音加恤未垂可奏之恩茲不避於重誅願再傾於危懇中謝伏

念臣早塵科等亟踐禁聯知忠義可以報君歷艱險未嘗辭命故一紀之當三路由壯及衰寸心之慮萬端因勞致疾若非神猶昏劣事不支持則安忍舍平生盡瘁之勤掇苟且自容之謗伏望尊號皇帝陛下大明委照洪覆推仁不令可治之痼遂絕必生之望特還舊秩俾治本邦如此則宿疹易攻庶未先於犬馬微軀所效復思死於封疆臣無任

知相州乞罷節鉞表

臣某言奉勅差知相州仍以臣累表乞守前官赴任伏蒙聖慈降詔不允已於今月二十三日到任上訖守邊不可以疾居誠宜引分求郡莫如於鄉便冀一均勞所祈使鉞之還蓋協帥臺之罷君仁至厚止易地以推恩臣寵無加遂擁旄而歸里榮兼今昔義激死生中謝伏念臣自忝決科則思陳力非微軀獨不自惜幸明主得其親逢故常奔趨險艱如履平地顧視權利輕於浮雲當人之不欲為則保完難必處事之易及責則憂患常

深志雖不回病已中作尋竊自忖較其所長人神之勞
過焉斯斃天光之蘊定然後明與其勤死而無成熟若
少休而再效為慮既審露章不疑幸遇尊號皇帝陛下
德洽普天愛存舊物輟御醫而來視知賤疾之匪常特
徇至誠許辭重寄不奪洋川之節就更河宣之封踰旬
解裝行路無苦遂得均頒牛酒慰舊老於鄉中羅列旌
幢拜先臣於墓下不徒歎聳於當世實足夸傳於後來
臣敢不論病以體國之宜攻疹以及民之瘼怡然靜守

保于至和苟卧漳沈痼之可痊雖疲未棄則據鞍矍鑠
而思用有急當先誓畢餘生仰酬洪造臣無任



安陽集卷二十六

欽定四庫全書薈要卷一萬四千一百二

兵部

安陽集卷二十七

宋 韓琦 撰

表狀

辭免集賢第一表

臣某言伏奉制命特授臣依舊工部尚書同中書門下平章事集賢殿大學士仍加食邑食實封者樞筦無功方期自劾疑丞有缺驟爾叨榮雖君恩之非常在公議

則不可夙夕震駭莫知所安中謝竊以王者端拱穆清
責任輔相內使萬物無不遂外使四夷無不恭陰陽協
於時是曰燮和之效卿士得其職斯為選擇之明天下
繫其安危國體隨而輕重所付一失為害豈輕如臣者
樸學非長孤忠自信早慕古人之行已不能枉道以進
身立朝以來皆上所悉自羌庭之叛命去詞掖以臨師
周旋兵間竭盡死節僅息塞防之警入參幾務之微一
簣障河欲得災而不顧叢輕折軸終積毀以難勝尚塵

秘殿之資屢忝要藩之寄疲駑將覺善御猶勤更帥領
於二垂遠威顏於一紀忽嬰危疾幸假本邦厓屏適養
於餘痾宥密亟還於舊物卒無他技條已踰年縱顯黜之
未加亦素餐而自愧豈謂伏蒙尊號皇帝陛下高天廣覆
厚地博容不求備以取人奉無私而臨下出於睿斷擢正
宰司方今人安承平俗尚苟簡革弊者目為生事謗必交
興擢才則指以樹朋巧焉求中生靈已困而倉廩未足戎
狄難保而備豫未完茲朝廷大有為而及時豈淺薄不稱

職而可任况簪紳之近列皆棟幹之美材不此詳求豈
無遺滯伏望皇帝陛下特回聖慮謹擇高賢使施設之
一新必太平之坐致如此則使人以器免懷過分之憂
唯君知臣雅得量能之道儻垂開可更誓糜捐臣無任

第二表

臣某言伏奉制命云云尋具表陳讓蒙降批荅不允者
臣聞天下安而注意相蓋以仰成官不備而惟其人無
容叙進故避賢之為請誠度德之匪堪慝懇未俞措躬

無地中謝竊以前記之載治道可詳雖有甚盛德之君
必擇非常人之輔所以五臣佐舜十亂翼周蕭曹魏郗
繼美於漢朝房杜姚宋相輝於唐室固以聳風烈於萬
世不獨致太平於一時豈在聖辰所宜輕授伏念臣早
繇科選亟漸寵階天與至愚顛沛必思於忠義人嗤拙
宦周旋不避于艱難白首三垂鴻毛一命賴清衷之獨
照致危迹之終全遂起病餘復玷樞任犬馬之報增激
螢燭之光幾何坐易歲芳日孤人望豈謂伏蒙尊號皇

帝陛下不遺小善務取大方曲矜簪履之微驟有鼎槐
之拜雖聖人之存舊物特示優恩顧賢者之抑下陳豈
無公議撫躬自省通夕如燔是敢再達讓封重于宸聽
願敷求於全德俾宰正於庶工必能膏澤四方廣矣庶
官之遂丹青萬化煥然王度之明使陛下協能官人之
詩免微臣獲不知量之過至慈垂允輿論乃安臣無任

謝表

臣某言伏奉制命云云尋再具表陳讓蒙降批荅不允

仍斷來章者右府本兵之重曷贊幾微中台象極之崇
遽叨選任自顧非才之及此必非公議之所容存拜讓
封訖無可報俯俸祇命覲羞在顏中謝臣聞聖王不以
獨化爲高必置相而圖治賢臣不以極位爲樂貴行道
以濟時上既勞於所求下亦艱於所遇故求之得則仰
成於庶務待以不疑遇之合則協力於萬機果於自效
固可以日興頽弊坐致太平生靈蒙福於九圍君臣垂
美於萬世恭惟尊號皇帝陛下堯仁舜孝湯智禹勤言

動不諫而未嘗過爲道德是富而無一他好而猶念天下已治而恐啟於亂天下既安而預防其危精擇輔臣以裨至化而臣學無根本性多滯迂不知前世建治安之原徒愛古人立忠義之節周旋俗務眇末常勞塵樞府以議邊尚詳梗槩玷鼎司而論道何所開陳忝冒以來夙夕無措蓋以陛下有置相圖治之聖而臣非行道濟時之賢何以仰副天心俯慰人望然陛下既已求臣之誤亦當待以不疑而臣所堅遇主之誠唯誓果於自

效勉企前哲動思至公庶幾民底小康時無大沴少寬
待旦之慮免累知臣之明填壑未間期報如此臣無任
辭免祫享加恩第一表

臣某言伏奉制命特加臣同德守正功臣并食邑實封
者講上儀於宗廟方成孝饗之能廣太嘏於辟公首被
慶恩之渥冒榮爲過顧己弗安中謝伏念臣早以孱愚
誤膺眷任進歷樞機之重擢聯丞輔之崇夙夜以勤揆
一心而雖至才謀之短稽衆論而愈喧屬丁閏祫之期

獲相親祠之禮精純所致顧盼蠻以來歆陟降無違在
贊明而何有及此受釐之始亟塵差賞之優錫號褒功
增封衍食省無勞而若是惟力讓以爲宜伏望尊號皇
帝陛下攬二柄之公體萬機之謹俯矜危懇追寢命書
如此則維鷄在梁免速聲詩之誚若金用礪更加磨切
之忠臣無任

第二表

臣某言伏奉制命云云尋具表陳讓蒙降批荅不允者

祭之爲澤雖有國之常經賞不以勞亦爲臣之當讓奏
封斯確詔荅未俞退自省顧不勝憂畏中謝伏念臣進
繇孤直任玷弼諧常待罪以弗自安敢僥榮而不知量
比屬欽修曠典祇事闕宮舉歷朝未行之儀成羣主合
食之禮辟公咸暨慙無顯相之容福祿既均首被便蕃
之命顧冒塵之可愧敢辭避之匪誠聖聽莫回愚衷愈
悻伏望尊號皇帝陛下據公以議懋德必先稽惟名不
假之言徇所欲必從之義亟收誤寵明勸有功庶鳧鵠

之分獲全則犬馬之心盡報臣無任

謝表

臣某言伏奉制命云云尋再具表陳讓蒙降批荅不允仍斷來章者登羣主而序昭穆甫畢親祠肆大眚而均福釐俄周率土忝被臣鄰之列首膺優渥之恩避讓弗俞省循無措中謝伏念臣性直而戇識昭且疎徒知忠義以事君不顧險艱而效死危塗屢覩鴻造終全存司樞筦之繁進領鈞衡之重聖主之責愚相其可容誅倦

今之治薄民烏能知化日須明黜免累至公幸遇尊號
皇帝陛下守位以仁奉先惟孝謂郊而祀天地雖三載
之躬行廟以合祖宗則歷朝之未講此時思而舉墜屬
閏祿之丁辰能享休成霈澤滂被惟是鼎槐之近特先
綸綽之褒增唐閣之美名衍漢封之多邑賞斯為誤義
不容辭敢不祇奉國經勤宣上德協心以濟朝得衆賢
之和弼教于中福有庶民之錫冀道素餐之責少裨旰
食之勞臣無任

辭免昭文第一表

臣某言伏奉制命特授臣行刑部尚書同中書門下平章事昭文館大學士監修國史兼譯經潤文使仍加食邑食實封者臣聞天之明堂尊曰上相國之冢宰冠於六卿七政從而後觀四海倚之均一建官之重推象可知豈容非才遂得次補中謝伏念臣學不根道智非逮人徒知忠義之敢爲獨荷聖明之垂諒嚮繇樞管擢備鈞衡幸遭時而得君有同心之輔政夙夜圖報歲時趣

過經遠所存卒無近效竭誠之得不免衆嗤上誤一人
之知下騰多士之誚惟思引避敢覬寵遷伏遇尊號皇
帝陛下大度包荒鴻仁廣愛悉其心之頗至恕其力之
未任猶矜駑孱謂可驅策屬此元臣之眷忽罹壽母之
憂不忍奪親而傷恩終聽執喪而得禮亟蒙序進殊失
僉求方今當極泰之時稔積習之敝遽然更化則議論
難齊徐以收功則責望方峻而况天時未順民困弗充
水旱相仍災異數見誠聖人恐懼大有爲之日顧愚臣

謫薄無所取之材恬然冒榮罪不容戮伏望皇帝陛下
念祖宗至重之業推天地大公之心謹擇時賢稽參物
論宜得魁傑非常之佐以副焦勞求治之勤使百度修
明萬靈和喜則陛下高拱而揖堯舜羣臣相讓而歸臯
夔如臣甚庸願寢成命臣無任

第二表

臣某言伏奉制命云云尋具表陳讓蒙降批荅不允者
冢卿之缺烏可序遷衆議之公豈容非據拜章以讓承

詔未俞夙夜震營莫知所措中謝伏念臣起於孤官粗
識大忠許國忘身故不論其險易推誠遇物蓋無別於
恩仇人嗤其拙而臣不可移臣執是愚而上卒見信以
至再陟樞機之重對司鈞軸之崇聖主仰成恨無所報
僚賢一意知豈不爲然而志雖廣而才不能周任既重
而力終取困凡於施設動得詆譏加災沴之荐臻在燮
和而當罷豈謂伏蒙尊號皇帝陛下無求速效尚責遠
圖屬元宰之遭憂亟大庭而申號特從次補益駭羣情

且論道者本不備而惟人祿德者非累日而取貴必若以資而遂進則其於勸也誠難伏望皇帝陛下博選真賢上裨至治况內有雍容侍從之列皆傑出之材外有文武屏翰之臣悉老成之舊少精聖慮自協僉言夫臣何堪敢冒茲寵幸寢已行之命庶全則哲之明臣無任

謝表

臣某言伏奉制命云云尋再具表陳讓蒙降批荅不允仍斷來章者大號式孚理雖難復非才自視懼不克堪

讓懇繼陳俞音卒恹拜寵恩而斯誤質公議以何安中
謝臣聞元首之任股肱貴不隳於萬事冢宰之佐邦國
在能正於百官惟朝廷之重輕繫選任之得失擇人之
謹自古爲難如臣者樸學非長孤忠鮮助自優塵於科
等恥平步於貴階周旋俗吏之爲慷慨壯夫之節邊囊
外謹謗篋中煩幾汨沒於風波荷照臨於日月樞庭荐
陟宰柄參持念嘉會之親逢惜良時之易失同心交儆
衆敝力蠲治本所先亦粗施其一二人情未厭盖久樂

於因循毀既積而增危任不勝而當譴幸遇尊號皇帝
陛下高明廣覆博厚兼容巍然執契之尊深得馭臣之
要以謂任人之道圖舊所以知之詳勸士之方重祿所
以須其報故茲遷擢遂及虛辱敢不博引羣賢大明衆
職躋民仁壽之域務廣聖猷俾后堯舜之心勉希前哲
庶幾拙效少荅君仁臣無任

進嘉祐編勅表

臣某等言恭聞古先哲王議事以制不爲刑辟蓋人情

萬端法制一定夫以一定之法而制萬端之情欲輕重得宜古今無易不其難哉國家睿聖相繼承平百年立法本通務歸至當故自建隆以來迄于慶厯之初凡詔令所下綱條既繁則必建局命官一加刪定者豈欲紛更而數變哉亦慮乎執定制而失人情也今之論次所付匪輕夙夜以思懼不稱職中謝竊以律設大法不能委曲而生意國用中典至於治平而後詳上既極於哀矜下無容於壅塞凡於闕漏皆得指陳前書之載或疎

後令之明寢密平亭差惑牴牾且多觸禁之民幾不知其所避舞文之吏足緣之而爲姦不有刊裁詎能永久恭惟尊號皇帝陛下法天任德本道無爲恢陶唐畫象之仁降天乙弛罟之惠永惟庶俗期底大中謂制禮以禁未然豈嘗忘教明刑而使無犯自亦知方顧茲請比之文日益煩苛之敝几閣之盈難於徧睹錐刀之末虞乎盡爭時合當更政其先務乃詔臣等特新編葺得盡詳度於是取慶厯編勅暨嘉祐三年終以前續降條貫

凡四千三十一道求中而議就約以書存所便安汰其
重複至於名篇而附律先例以舉凡會數勅而同一科
參舊文而發新意事並出則分從其類禁當立則特爲
之條皆明著大防稽合前式臣等又以四海之廣獨見
莫周雖當局之勤謂所思之已至及約情而用或在理
以猶差必欲成本朝之善經固當合天下之公論首祈
博訪亟奉俞音果衆說之畢伸亦寸長而備採復詳慶
厯編勅每條之後必書元降宣勅年月雖云舊體其實

文煩今並改注於目錄逐條之下以從簡便又刑統所附諸勅及參詳條件凡一百三十四道事雜前朝率多衝改審核之際典者爲勞今取其見今可行者已入逐門収載外其刑統內諸勅并參詳條件伏請更不行用應中書樞密院聖旨劄子批狀合行編錄者悉改爲宣勅共刪修成一千八百三十四條離爲一十二卷內有條目繁多者即分爲上中下共一十八卷總例一卷目錄五卷凡勅內但行約束不立刑名事理輕者析爲續

附令勅三卷目錄一卷犯者止從違令之坐及錄到慶
歷四年正月一日後來赦書德音二卷總三十卷合爲
一部如得允當即乞特降勅命與刑統律令格式及建
隆以來赦書德音天聖中先編附令勅兼行其慶歷編
勅及慶歷續附令勅并嘉祐三年終以前應係海行條
貫除今來已編載外各更不行用四年正月一日後續
降自爲後勅施行自來權茶之法今已刪除其通商之
後所立條約自從詳定茶法所條次頒降應未降新嘉

祐編勅以前已用舊勅斷遣與奪過公事不在援引新
勅訴理之限其一司一務一路一州一縣并在京海行
及三司見行條貫自依逐處元編定及續降勅條行用
外內有係新編勅兼載與逐司舊制不同者並依新編
勅處分蓋以惇崇寬大蠲滌細微較然使其易知欽哉
本乎惟恤譬夫江河紀地狎玩者誠稀震曜發天威明
之共仰其或多方謹飭庶務持循臨文參考於治宜決
事深求於法意自然訟平以息氣感而和能致太平豈

獨稱於周禮終成徽倖茲奚取於鄭書臣等道鄙少恩
志希無害被詔徒知於竭慮訖功殊愧於淹期或許頒
行仍乞以嘉祐詳定編勅爲目其新編勅等共三十卷
謹隨表上進以聞臣無任

辭免登極覃恩第一表

臣某言伏奉制命特授臣門下侍郎兼兵部尚書同中
書門下平章事昭文館大學士監修國史兼譯經潤文
使進封衛國公加食邑食實封者真主御圖普天蒙福

忝備臣隣之列首膺進陟之榮命出非常愧難自處中
謝伏念臣早遇先帝亟登冢司大政大謀固無裨於萬
一小材小謹徒粗免於過尤方瀝懇以抗章冀避賢而
獲請剡牘未再號懇莫攀伏遇皇帝陛下神聖嗣昌天
人合應誕布惟新之澤更惇圖舊之仁逮此告庭遽先
增秩矧東臺四品之重常伯七兵之崇既大國封復優
邑賦使宗臣之當是寵猶恐弗勝顧愚宰之無甚能豈
宜輕授伏望皇帝陛下始乾剛之斷發離正之明深惟

聽覽之初動切施爲之謹悉停異數以協公言如此則不稼而取廩未免無功而被刺捨魚而欲熊掌哲言見義而必爲臣無任

第二表

臣某言伏奉制命云云尋具表陳讓蒙降批荅不允者大君膺歷綿宇推恩澤逮羣元宜至微之必浹寵先四近顧無狀以何勝輒上奏封冀還渥命聆詔音之未可揣愚分以難安中謝伏以先皇帝仁如高天容則厚地

自詩書之所載冠今古以無前與儉守文致成康之美
俗先知傳聖得堯舜之大公皇帝陛下奉若先猷纂隆
大寶中外稔聞於聖德謳歌允協於天心慶賜之行幅
員同忭臣叨塵輔翼素乏材謀當聽斷之惟初在贊襄
而何有褒榮驟及震慄無從伏望皇帝陛下攬國權綱
新民耳目黜陟大柄必本於無私左右弼臣俾全於難
進亟追誤賞以勸多方上化之行必捷置郵之傳命臣衷
所報更堅忠義以忘身臣無任

謝皇帝表

臣某言伏奉制命云云尋再具表陳讓蒙降批荅不允
仍斷來章者睿聖膺圖肇覽八紘之緒幅員霈澤交歡
萬國之心眷惟丞輔之臣首玷便蕃之寵無容避免徒
極兢慙中謝竊以鸞省邇聯地亞珥貂之貴天臺上列
官推司馬之崇爰自近年罕嘗兼拜如臣者性惟甚戇
學不能醇偶熙運之寢昌竊殊科而獲仕孤忠自立衆
毀交騰先皇帝察惟直之無他謂顛愚之可任擢躋顯

近力主單平奔走三垂有徇國忘身之志周施二府之
佐王經遠之謀逮升冢席之榮益起素餐之誚避賢奏
牘方上印以輸誠喪考纏悲忽攀髯而發慟伏遇皇帝
陛下丕承大統光紹慶基盛德之新罄萬方而咸覩湛
恩之降浹四海以無垠故此弼臣特先異數俾正名於
宰任復增重於官儀仍遷公爵之優更益邑租之厚俯
俸之辭莫遂庸駕之分何勝敢不謹極冰淵守堅金石
良時易失惟勤拙者之爲高位疾顛常蹈古人之戒少

裨至治上荅殊私臣無任

謝皇太后表

臣某言伏奉制命云云尋再具表陳讓蒙降批荅不允
仍斷來章者龍德在天慶一人之纂極陽春布澤浹四
海以蒙休惟是弼臣首膺褒典辭甚堅而莫遂躬屢省
以無容中謝伏念臣早竊榮科寢階膺仕自信鄙夫之
守特深先帝之知外禦疆垂五玷師權之重入參樞筦
再塵機務之繁逮進陟於冢司固取輕於人望適露請

藩之奏遽承憑几之言伏遇皇太后殿下坤德居中母儀形外翊皇明而增煥協聖治之有初爰霽大恩咸均庶位顧惟蒙陋前忝龍光峻卿列於中臺正宰名於黃闈仍優封爵益厚食租令如汗以靡收寵若驚而自失敢不任責歸己竭誠在公以道事君勉著經邦之效無功受祿終期上印之歸臣無任

安陽集卷二十七

欽定四庫全書薈要卷一萬四千一百三

集部

安陽集卷二十八

宋 韓琦 撰

表狀

甲辰冬乞罷相第一表

臣某言伏以四時助天尚有為而必去大臣佐國豈不能而可居茲省分以退身幸推仁而從欲中謝伏念臣早繇科選寢被寵甄不知直道之難行徒以孤忠而自進仁

宗皇帝矜其少戆待以老成慶歷之初已贊近樞之重嘉祐之始復還幾務之崇亟踐宰司過膺冢任惟心祈報謂時敝之可更其術之疎質人情而愈戾方求引罷免玷弼諧忽悲軒馭之登天獲奉舜躬而受歷永昭置使既畢九虞長樂復權肇新獨斷欲貢避賢之請俄推進秩之恩面謝之辰言陳備極愧冒塵之為久加旰瘠之日增止俟首冬懇辭重柄此愚誠之上叩蓋睿聽之前知伏望皇帝陛下圖治有初任良為急引天下之才以自輔采庭中之議

而必公不私一臣遂收全美聽還印綬出守圭符叢爾
之軀儻少休而未殞確然之守固臨事而不移臣無任

第二表

臣某言近上表乞罷相任出補外藩蒙降批荅不允者
輒傾愚悃冀解冢司承詔未俞措躬無所敢再披於肝
膈固莫道於竄誅臣某中謝臣聞駑馬之材駕雖十而
終勉鼯鼠之技能有五而遂窮分不可踰過之必敗如
臣者素無遠策粗識大忠特膺先帝之知驟忝弼臣之

冠歲芳屢易人望日輕廊廟之言卒愧負薪之鄙功名
之減無偕治郡之時適貢囊封願還柄任遽號弓而茹
痛方奉瑁以參儀前懇莫伸厚顏無已比者恭遇皇帝
陛下睿謀天發聖斷日新宜登進於真賢以輔成於至
治豈容衰朽尚爾冒塵伏望皇帝陛下曲霑鴻私與全
晚節許罷台衡之重俾紆郡紱之榮欲竭之神苟漸蘇
而復觀甚難之務唯所用以無辭臣無任

第三表

臣某言近再上表乞罷相任出補外藩蒙降批荅不允者兩上奏封願還宰柄仰俞音而尚閱顧衰迹以何安重此披誠終期賜可臣某中謝竊以高位之處古人戒乎疾顛大名之居君子恥於難副故知而退則全止足之分昧而進則蹈危亡之機臣雖甚愚敢忽斯義伏念臣自塵侍從即走疆垂當兵戈未艾之辰有夙夜服勞之苦逮參樞務丞領藩條繼守兩邊又幾十稔比踐更於二府條九見於周晷以寸心而慮萬微以一身而當

衆責力雖自任疾已交攻儻不止於夜行必溘先於朝
露譏哈中外玷辱國家矧今論道巖廊悉臯夔之舊德
宣威巨屏皆方召之傑臣至于貴近之聯率富經綸之
業伏望皇帝陛下照孤誠之不安矜悴質之無堪收攬
衆賢左右新政使臣退安便郡獲保殘軀上以彰大君
含育之恩下以息多士紛紜之議惟堅素守上荅至仁
臣無任

乙巳夏乞罷相第一表

臣某言伏以王者之尊作命存乎必信人臣之分知退
本於不能茲再避於冢司幸前膺於聖諭臣某中謝伏
念臣駑馬之賤任重而斯覲畫餅之僞循名而則虛徒
以誤知先朝竊位二府自冠臣鄰之重益慙風烈之衰
伏遇皇帝陛下躬紹寶圖獨開英斷以聖主而用愚相
曷起治功不累日以進大材固妨賢路矧復繁機外擾
故疾中戕精神日極於昏疲形貌衆傷於癯瘠比傾血
懇上叩睿慈冀從出守之求少遂養痾之便皇帝陛下

以謂情雖可惻去匪其時俟仁廟之終祥許囊封之請
罷德音在耳律候當期願回天地之私亟假麾符之寵
君言勿戲翦桐之錫猶封鄉郡獲歸衣錦之榮孰再誓
捐軀命仰荅恩仁臣無任

第二表

臣某言近上表乞罷相任出守外藩蒙降批荅不允者
比披丹赤仰叩睿明君命有孚固指期而當罷天衷莫
測猶可詔之未頒撫己以思措躬無地竊以嘉善而矜

不能者君人之全度進賢而退不肖者興治之大方故不能與不肖者留則下無所勸善者與賢者之抑則政將甚疵臣雖至庸敢害公議臣某中謝伏念臣早繇孤進亟陟近司報國之心雖竭忠而自許致君之效卒充位以無聞包羞十稔之間積愧衆賢之上向者幸遇皇帝陛下躬親聽斷中外又安嘗比上於封章願少休於罷蒞俄膺召對竊記德音茲再露於懇誠蓋前祇於訓諭伏望皇帝陛下不牽私愛特示至公知臣不能而可

矜謂臣不肖之宜退許還相紱俾任鄉邦馬牛之力粗完必思驅策天地之恩再造曷報生成臣無任

第三表

臣某言近再上表乞罷相任出守外藩蒙降批荅不允者非才決去爲瀆誠煩優詔弗俞示恩良厚雖已殫窮於賤懇不能感動於清衷得非斷以常情謂非本志匪過邀於聖寵則外迫於人言勉辭要權苟備禮數逮降斷章之荅因爲固祿之資臣之所陳蓋不近此臣某中

謝伏念臣自玷二府于今十年竊稽累朝之任官雖有
名相之在位得如茲例且無數人况臣齷齪何能區區

自守廟堂之上不過俗吏之施爲搢紳之間動有迂儒
之閔笑加以早膺驅策備歷艱劬積憂日耗於精神竒
疾潛生於臟腑比雖自力寢覺難支故於前後之封章
備著悃誠之激切方期再懇必復上言伏望皇帝陛下
深惟萬務之繁特謹四鄰之選不曲全於舊物示公進
於真賢令臣只守本官退安散郡名優治俗庶希黃霸

之清風心切報君敢慕赤松之高蹈儻暫休於犬馬期
再效於消塵臣無任

災異待罪第一表

臣某言伏以人主之操賞罰貴乎不私宰相之調陰陽
在乎無忒苟天時之作沴繫人事之不修當責其誰是
惟冢輔臣某中謝伏念臣頃遭際會遂冠臣鄰當堯舜
之纂承乏臯夔之事業故聖心願治日極於咨詢而樸
學素空卒無所補助居常省分屢已抗章雖引去之未

容益自知其難處今此仲秋之始忽興淫雨之災京邑
之間日纔信宿室居之壞十殆四三民胥嗷然駭無所止
伏惟皇帝陛下紹膺寶命勤究永圖言動之微亦無過
舉政刑之謹必憲先猷惟高穹之甚明宜嘉應之適格
茲咎安在其來有繇蓋臣充位無聞素餐已久衆賢沈
抑而不能彙進輿情鬱塞而不能上通既汨五行遂隳
庶務豈可以頑然自若恬不知慙伏望皇帝陛下稽合
天心申明國典驗往誥雨暘之所自法前朝災異之所

行敷告大廷亟行顯黜使四海之內皆知震曜之威則諸福之來是猶桴鼓之荅臣無任

第二表

臣某言近以天雨之淫都城特甚乞從免黜以塞荅災蒙降批荅不允者竊以三公之理陰陽冢宰之主政治盖今首相之任誠繫四方之瞻官匪其人變不易發臣某中謝伏念臣素無他技徒偶亨期因緣犬馬之勞忝冒鼎槐之冠推賢避路既未遂於愚衷竊位素餐固不

容於天理而自皇帝陛下紹承統緒振肯紀綱思兼三
王待旦之勤已至恭用五事承天之德無差何茲暴靈
之來頗戾至和之應遇裁以懼煩引咎之過深責相之
愚幸寘刑而有舊願正變調之失特申竄謫之科如此
則風雨時而三階平自銷民疹股肱良而元首起坐見
治功臣無任

第三表

臣某言近以淫雨之災乞從罷免伏蒙聖慈再降批荅

不允仍斷來章宰職不修當明於國憲君恩過厚尚損於詔音雖聖度之如天欲自容而無地臣某中謝臣聞古者至治之世風雨節陰陽和百穀歲登萬物時遂蓋有德者進而無德者退有功者上而無功者下人事既得天心自符應之善祥是若影響恭惟皇帝陛下協大橫之兆承累盛之基即位以來勵精爲治臨朝親決有唐堯之聰明約己自修侔夏禹之勤儉然猶吏多弛職俗靡還醇得非黜典之公不先貴近故俾政綱之紊未

振隳頽今大異之所來匪冢司而孰咎宜因此變遂正
彛章縱寬斧鉞之誅必用竄投之法則人心自化坐移
偷薄之風天監弗違日見太平之象臣無任

乙巳冬乞罷相第一表

臣某言伏以佐天子理陰陽外鎮撫四夷內親附百姓
使卿大夫各得任其職者宰相之事也位高責重爲時
具瞻豈容非才得久其地今茲決去必覲俞恩雖獲重
誅義不能已臣某中謝伏念臣斷斷之技無殊衆人際

會先朝遂塵冢席雖夙夜自竭期有以報不次之遇而
智局淺陋卒無云補伏遇皇帝陛下紹隆聖緒力思致
平臣復不能恢宣遠圖上助新政徒尸厚祿日積愧慙
故自去歲以來凡三剖血誠請還柄任章十數上未蒙
賜可包羞就職愈不遑安蓋以淫雨之災仍歲而發傷
害禾稼漂摧室廬都城之內墊溺殊甚連陰累月蔽遏
大明塗巷之人指談時政此可謂能理陰陽乎西戎驕
僭爲亂萌孽時率醜類肆擾屬羌增備益師上煩宵旰

此可謂能鎮撫四夷乎環畿之郡民罹歲荒餓殍流庸
失職者衆賴天造垂惻賑給必周而重困之餘遽難完
復此可謂能親附百姓乎滯固之識闇於任人不能廣
擇羣材共熙庶務使賢者在下鬱而未伸此可謂卿大
夫各得任其職乎有一於此被黜爲宜而臣衆事不修
咎將孰執安得不自劾無狀而恬然不退哉今幸郊禮
休成邊垂事簡臣不勝懇迫願罷首宰之職避賢者路
伏望皇帝陛下不牽私愛斷以大公俾臣外補小邦得

安愚分彙進良輔以興治功自然陰陽日和衆沴不作
四夷款服百姓乂安內外小大之職皆惕然相飭競著
成效此則宗社無疆之慶蒼生莫大之福非特愚臣之
幸也臣無任

第二表

臣某言近上表乞罷首宰之職避賢者路伏蒙聖慈特
降批荅不允者臣聞以道事君不能者止大臣之操也
無德者退有功者上治世之法也若不能而不止無德

而不退則是不知大臣事君之道而撓乎治世之法也
故敢不避斧鉞再瀆宸聽臣某中謝伏惟皇帝陛下承
四聖之緒興百年之業宵衣旰食垂意萬務而臣任玷
冢弼歲月久甚以齷齪之守淺淺之見固無以光大新
政而彈壓天下乃陰陽失序戎羯弗馴百姓未康衆職
不舉四面之責畢叢於臣茲所以當食輟餐通夕不寐
覆載之內若無所容儻陛下未賜罪誅使之善去畀以
小郡與全始終此則天地含育之鴻造父母顧復之大

恩百殞臣身未能報塞臣無任

卷二十八

第三表

臣某言比者存傾血懇祈罷冢司伏蒙聖慈特降批荅不允者承命震駭不知所處重瀆天聽繼之死請臣某中謝臣聞之易曰鼎折足覆公餗其形渥凶孔子以爲德薄而位尊智小而謀大力少而任重鮮不及矣臣性椎而拙以道獨進先帝察其忠朴亟被顯擢兩塵樞府遂冠丞弼在臣圖報之志雖捐軀命而無所惜然而德

不足以服衆智不足以慮遠力不足以勝任徒淹歲月
莫建治功若非省分退身避賢者路不獨折足覆餗自
貽形渥之凶其於國家爲害豈細也哉故自皇帝陛下
臨御以來累上奏封願還相印始陛下以未終諒闇去
匪其時次陛下以邊事方興未當求罷臣雖上體聖意
勉陪國論其如外涉要寵不誠之迹內懷空餐曠責之
慙出入朝廷自無顏面况臣待罪首宰調變無狀災異
數見淫雨連月民用失職罔不愁歎今疆候無警言裡禮

慶成乃陛下采拔羣賢一新庶政以消天變之時也臣
愚不勝愧栗伏望特舉兩漢災異之法而明黜之若以
其攀附龍鳳依光日月塵污重任將踰十年夙夜憂勞
故疾增劇畀以鄉郡稍從休息此則天地之造屈公議
而全大恩臣非木石其心猶冀養氣而粗完保衰而少
強矍鑠奮身以當陛下急難之用庶效毫髮以酬至仁
臣無任


安陽集卷二十八

謹案卷二十七第四頁前一行中台象極之崇刊
本台譌合今改

第十二頁後五行悉改為宣勅按別本無改字今
依原本

卷二十八第六頁後八行卒無所補助刊本所譌
於今改

第七頁前二行日纔信宿刊本脫宿字今據別本
增



總校官庶吉士臣侍朝

校對官庶吉士臣陳崇本

謄錄監生臣衛子忠

欽定四庫全書薈要

集部

安陽集卷

二十九至
三十四

臣
王杰詳校
詳校官助教臣常循



欽定四庫全書薈要卷一萬四千二百四

集部

安陽集卷二十九

宋 韓琦 撰


表狀

丁未因中丞彈不赴文德殿常朝待罪第一表
臣某言伏以朝之立制當謹奉行事有從宜寢成因習
果被憲臺之劾敢逃刑筆之誅臣某中謝伏念臣久玷
弼諧素慙椎鈍每俟延英之對動或踰時故趨宣政之

班居常曠禮自罹彈擊交切兢惶伏望皇帝陛下斷在至公懲其不恪特正慢官之罪以清著位之聯臣無任

第二表

臣某言近以久廢朝儀遂招臺劾雖拜章而引咎顧充位以何顏臣某中謝竊以舉按不避權豪憲臣之風采刑罰弗私貴近治國之紀綱豈容非才而得幸免伏望皇帝陛下主茲直道斷以大公早議正於常科以聳聞於庶位臣無任

丁未夏乞罷相第一表

臣某言天聽甚高尚應誠而必荅君仁至厚固無欲之
不從矧漉懇於先朝累避賢於冢任比申前志幸惻聖衷
臣某中謝伏念臣起自孤生早丁盛旦無左右片言之援
居疑丞四輔之崇忠義可為自顧微軀之草芥是非難一
何勝衆咻之波濤每內惕於虛辱日坐須於仆踣自仁皇
嘉祐之末逮英廟治平之間求解四五年凡奏數十上會
國家之多故蒙詔諭之弗俞終承賜可之言許俟及暮而

罷雖德音之未遠，悵仙馭之難攀，僥榮至茲，負愧殊甚。伏
遇皇帝陛下乾剛獨運，離照大明，四海翹然，聳聽惟新之
治，羣材森若，欣為不世之逢，而臣監拔非長，設施滋惜，天
時數沴，焉能知燮理之方，病力何堪，日以見昏疲之狀，恬
然不退，衆將謂何，伏望皇帝陛下施厚乾坤，恩隆父母，察
危，悰之匪妄，矜薄技之已殫，聽罷宰司，俾從州任，形之
將，敝儻粗獲於安，休事有至難，願再膺於驅策，臣無任

第二表

臣某言近上表乞罷相任伏蒙聖慈特降批荅不允者
比傾愚款仰叩睿仁竊惟引去之當然自謂開陳之已
至尚稽可報彌不遑安臣某中謝臣嘗歷覽前編欽聞
善戒知止足者蓋道家之重瞰高明者亦神理之常故
謙畏自持退則享安全之福滿盈不懼進而招顛覆之
災况臣本乏材謀濫魁丞輔三朝遇主惟力報於聖知
一紀備員固久妨於賢路加以病襟滋耗宰職殊隳以
樸厚矯時而風俗愈媮以勤瘁勸功而官曹尚苟既不

能振紀綱之頽敝又無以增堂陛之高嚴徒日積於罪辜將不容於竄殛茲所以懇還印綬免誤國家伏望皇帝陛下推大公以爲心監小慈而傷治不以舊人而牽愛必思新政之更張早霈德音許還柄任畀之一郡得遂養於衰殘其若再生第知歸於化育臣無任

第三表

臣某言近兩上表乞罷相任伏蒙聖慈再降批荅不允仍斷來章者陳力不能已薦傾於悃悞退人以禮猶過

示於恩私雖詔諭之頻仍揆疴之忝冒不膺可報未
已哀祈臣某中謝竊以累聖重熙百年長楸顧此治安
之本誠資輔翼之良惟隆名素望者可以久居豈多病
不才者所宜媿處故臣自叨冢任常揣孤誠雖有俾后
堯舜之心而無躋民仁壽之策苟坐淹於歲月徒自取
於竄誅所以屢叩先朝極陳愚款願解台衡之重再塵
鄉郡之榮宸衷有示於矜從天下遽悲於過密幸遇皇
帝陛下纂隆丕祚恢闡大猷發號令而一新振紀綱而

盡舉日月所照皆知聖明中外之心罔不歡喜比率土
大寧之慶是老臣當退之時伏望皇帝陛下俯諒危悰
曲成先訓特寢斷章之荅亟推如請之恩命守本邦進
登賢弼衰骸少息惟歸感於上仁直道自將誓愈堅於
素節臣無任

丁未秋乞罷相第一表

臣某言臣聞之易曰天道虧盈而益謙地道變盈而流
謙鬼神害盈而福謙人道惡盈而好謙是則物之盈者

天地神人皆不與之况其望實本輕材謀素寡竊位二
府殆將踰紀祿厚品極寵非其人可謂盈之甚者也此
而不退禍固隨之臣某中謝伏念臣叨遇三朝濫都元
宰以戇愚而待物自謂無欺於利欲以裁人焉能免過
羣言稔積公議喧聞加以宿疹中戕繁機外擾疔疲之
質寢以難支故自嘉祐末年以來累貢血誠求罷皆國
家多故不能遂請伏自皇帝陛下嗣承統業躬親聽斷
紀綱日振法度日修而臣多病不才略無云補備員冢

任其久如此所以抗章屢瀆懇辭重柄而蒙頒降手札
委曲悖諭趣令就職殊未矜從忍媿強顏至於今日茲
者先帝山陵復土萬世以安於臣子送往之心粗謂無
恨若不於此時上還印綬以避賢者則是冥然不知進
退之臣朝廷容之何以風勸天下伏望皇帝陛下念祖
宗所付之重當昧旦圖治之始登用良弼共熙新政俾
臣退補僻郡以寧悴軀示明主之大公全老臣之素節
內惟犬馬之賤苟未填棄溝壑猶冀養完駑力再效分

寸臣見於沿路至京以來聽候俞旨無任

第二表

臣某言近上表乞解相任蒙聖慈差中使降賜批荅不
允者臣聞老子曰功成名遂身退天之道也若其功不
足以暴當世名不足以服天下祿位盈極不懼而退者
豈非違天之道而自速其禍乎臣之無狀大過於此義
當再瀆罪亦何逭臣某中謝竊惟自唐至于五代首宰
之爲山陵使者事已求罷類多得請昨者昭陵復土而

先帝尚進藥劑故臣不敢質之前例遽然引去逮先帝
聖躬康復政治日新臣前後章數十上懇祈避位先帝
始雖不允郊禮之後屢曾親被德音止俟暮年聽臣補
外方俯期而露奏俄晚駕之莫攀皇帝陛下纂紹云初
謹奉遺詔因山之事俾臣復當使任不容固辭今幸衆
力輸勤反虞成禮况臣充位殊久宰政不修故疾嬰纏
日難牽強上稽天道次察人言內量非才遠按故事夙
夜媿恐無一可留之理伏望皇帝陛下俯曲睿監深照

危悰廣覆載生成之恩悉孤愚進退之分許辭冢輔界
以小邦則多病之軀少諧休息妨賢之咎免及竄誅臣
無任

安陽集卷二十九

欽定四庫全書蒼齋要卷一萬四千二百五

集部

安陽集卷三十

宋 韓琦 撰

表狀

辭免使相第一表

臣某言伏奉制命特授臣淮南節度使守司徒檢校太師兼侍中判相州加功臣食邑食實封者冢司備位屢陳懇去之宜故里班條重竊榮歸之幸顧便蕃之恩禮駭中外

之聽聞愧弗敢當避期得請臣某中謝伏念臣忠雖自性

戇不兼材久塵元宰之崇蓋辱累朝之遇正塗是闕愚守

難移責自任於四來謗不虞於三至再幸攀鱗之際會終

逃積羽之湮淪加疾疹之內攻覺疴疲之日甚薦形剡牘

力愬妨賢果回天地之仁獲假麾符之守然而敷五教而

分治領於外者幾希建六纛以臨戎兼為相者殊重仍視

帥臣之秩俾充鄉郡之行仰君命之非常質人言而可畏

伏望皇帝陛下謹守成之法推懋賞之公謂失簪履者雖

不忘求舊之思而上印綬者豈可被無名之寵亟停異數免玷大猷少寬忝冒之誅更誓糜捐之報臣無任

第二表

臣某言伏奉制命特授臣淮南節度使守司徒檢校太師兼侍中判相州加功臣食邑食實封尋具表辭避蒙降批荅不允者出守之恩顧衰疲之甚幸非常之命徒震駭而莫當辭懇雖勤詔音未可重茲干瀆必覲矜從臣某中謝竊以三公之崇固非人而不授五教所叙惟

處內而是宜矧兼真相之榮外領元戎之重在昔臣隣
之罷去無間寵異之及茲雖曰殊私豈容清議伏念某
孤忠少與椎直近愚自升拜於冢司倏再踰於閤歷有
尊主庇民之志而才不逮心負竊位素餐之譏而久增
其媿屢殫誠請求解櫟繁終垂惻於上仁得為藩於故
里不意曲加優遇駢錫徽章名器假人必累惟新之政
負乘致寇終傷卹舊之慈伏望皇帝陛下開博照之明
諒危悰之盡亟寢告廷之誤以章馭貴之公病宰乞骸

既免冒塵之踰分勞臣任力皆知勸賞之無私臣無任
謝除使相判相州表

臣某言近奉制命特授臣淮南節度使守司徒檢校太
師兼侍中判相州加功臣食邑實封尋兩具表辭免蒙
降批荅不允仍斷來章者宰職隳功莫副宵衣之治鄉
邦得請重叨畫錦之行被恩典之特優顧人言而甚愧
臣某中謝伏念臣早繇科第遂玷寵榮不圖翰墨之進
身自竭消塵而報國備負諫諍幾不免於竄投奮命疆

垂實薦罹於艱阻獨恃聖神之眷誰開援助之言仁宗
皇帝知其守以孤忠謂可屬之大事慶歷之始已擢貳
於樞機嘉祐之中乃進登於宰輔俄膺冢任益荷殊知
當英廟之承祧逮聖人之嗣歷稠重遭會罄竭愚庸惟
知社稷之安豈顧家宗之未然而萬微多務一紀妨賢
爲國持平敢自私於輕重裁人所欲固難免於愛憎加
疾疹之嬰纏苦形神之耗敝勉訖因山之禮懇陳上印
之宜伏蒙皇帝陛下念犬馬之力易衰擴日月之明爲

照不罪再三之請亟垂開可之音進秩地官剖符粉社
建高牙之重既䟽淮海之封增故里之光仍襲貂蟬之
舊叨塵之甚今古疇偕敢不思盡瘁於寢興泯置懷於
内外在邊在庭之責惟驅策以當前益堅益壯之心至
糜捐而後已臣無任

免冊命表

臣某言伏奉制命特授臣淮南節度使守司徒檢校太
師兼侍中令所司備禮冊命者地官之拜已過冒於寵

私冊命之殊愧重煩於優禮臣某中謝伏念臣素惟無狀久玷冢司茲懇避於繁機得出臨於本郡三公進秩方深假器之譏萬乘居尊敢屈臨軒之禮伏望皇帝陛下念國容之良重顧邦典之非常申飭攸司亟停異數庶少安於夙夜惟知荷於矜全臣無任

謝賜宅表

臣某言伏蒙聖慈特賜臣所賃官宅一區累具奏免奉聖旨不許辭避者補郡以行既極榮歸之寵僦居之久

又叨即賜之恩眷遇過優省循難處臣某中謝惟昔馭
臣之法無先懋賞之方其疇不私所予甚謹若甲第之
爲况必大功而後宜而臣自玷冢司訖無他效屢貢避
賢之請方蒙從欲之仁獲守本邦何啻昔人之夸耀所
膺異數絕非當世之擬倫已增積於厚顏復就頌於美
宅稠重感幸夙夕震兢敢不加治藩垣乃情王室居無
勢奪人知上賜以常存身靡家為日愧忠言而自激臣
無任

永興軍謝上表

臣某言奉勅差判永興軍府充陝府西路經略安撫使
兵馬都總管已於今月十一日上訖避賢而罷方獲典
於鄉邦改帥以行復誤膺於聖寄易晝錦還家之樂爲
夕冰將命之憂雖已見於吏民懼不勝其責任臣某中
謝竊以自陝而右惟雍處中昔日用兵嘗并制於諸路
平時無事遂分總於中權然而勢不相維事難克協或
左有防虞而右弗思於援助或彼專嚴戢而此姑尚於

因循致邊備之寢隳實議臣之同病欲正元戎之法式
欽睿筭之精恭惟皇帝陛下稟大舜之聰明邁成湯之
勇智謂堂上之兵必勝猶貴任人而閭外之制不專胡
能治衆俾悉歸於節度當謹擇於材雄而臣久冒冢司
積成衰疹適懇章之屢瀆得本郡以榮歸不圖乘障之
臣驟有邀功之舉一開邊隙上軫盱朝命更領於麾符
敢幸安於桑梓慨然就道遽爾之藩心目所經頗諳詳
於舊事精神之用已耗竭於當年茲惟仗國威靈挺身

忠義導天聲之震怒宣上德之寬仁外以圖疆場之亟
寧內以務編齊之無擾關中按堵苟粗底於小康鄴下
養痾願祇還於故守荷諭言之無戲期病質之少休臣
無任

戊申相州謝上表

臣某言近奉勅差判相州軍州事已於今月二十二日
到任上訖殄寇無謀積勞生疹恩還鄉守衣繡免譏於
夜行詔覲天闈錫馬屢膺於晝接遽辭軒陛即見吏民

顧忝幸以誠多撫孤孱而自惕臣某中謝竊以鄴都之
舊壤素爲河朔之近封民風甚淳郡務亦簡兵粗明於
紀律地不據於要衝他人得之尚衆稱於美任愚臣叨
此蓋籍隸於本邦况臣至和之中大鹵爲帥以沉痾而
露奏遂故里以分符比旌纛之再歸正星霜之一紀過
家上冢寵薦極於存亡垂組夸鄉事更光於今昔此蓋
伏遇皇帝陛下仁侔覆載德紹祖宗深憐累牘之告衰
乃命懷章而均逸帝宸賜見俯矜憔悴之容北道之藩

不奪便安之請臣謹當奉行寬詔畜養殘骸訪身之醫
而念國之醫治己之病而及民之病膏肓可愈苟無二
子之爲妖忠孝所存惟誓一門之圖報臣無任

安陽集卷三十

欽定四庫全書薈要卷一萬四千二百六

集部

安陽集卷三十一

宋 韓琦 撰

表狀

判大名府三年乞閑郡第一表

臣某言竊以驥老而責千里固何益於馳驅龜枝之有五能已自殫於短拙輒披誠而取喻覲恤隱以推慈臣某中謝伏念臣素乏材謀粗持忠朴惟幸三朝之際會

寢叨極品之光榮自移守於鄴都適三周於歲律事既劇而心雖欲勉病所困而力不能堪今復風入四支日加孳痛氣留兩脇內極攻戕蓋臣享厚祿而不知踰涯故天與沉疴而俾以自省思苟逃於凶折當上叩於聰仁伏望皇帝陛下隆天覆之恩念雲從之舊矜其久疾貸以餘生許辭將相之重權就易麾符於僻郡高明少抑免深鬼瞰之憂鍾漏向殘猶有夜行之媿臣無任

第二表

臣某言近以久疾乞辭將相重權就移僻郡伏蒙聖慈特賜詔書不允者臣誠已至本深知分以辭勞君聽未回尚惜推恩而賜可薦數危惘決俟俞音臣某中謝伏念臣四紀逢亨三朝竊寵良自無功而厚祿遂罹多病以久衰一辭東府之鈞衡再領北門之筦鑰莫非強勉以濟劇煩心雖云勞力有不逮然猶徘徊歲月偃息朝昏庶幾小康翻覺筋骸之愈憊若曰微效訖無毫髮之足稱雖恃聖仁實虞陰譴苟尚留於要地將不保於餘

生伏望皇帝陛下特軫孤臣曲全舊物許罷貂蟬之秩
并收旄鉞之權簡靜小邦俾獲親於醫藥支離瘁質或
未至於膏肓願垂從欲之慈敢忘糜軀之報臣無任

第三表

臣某言伏蒙聖慈以臣上表乞早俞前請就移邢相一
郡特賜詔書不允者疾難自力蓋當止於不能聽未及
卑尚莫從其所欲懼即填於溝壑敢再犯於雷霆臣某
中謝伏念臣生對盛期早塵顯服惟慮國家之難報豈

知才智之易殫逮處近司寢惟多病向辭上宰本圖勞
逸之稍均暨尹別京翻困劇煩之滋甚矧流年之三易當
疾疹之久攻庶務糾紛一身勉強生有涯而足愴神太用
以幾亡若將相之榮苟坐恬於尸素則寒暑之疹將遽及
於膏肓伏望皇帝陛下感動至仁矜全舊物回聖后燭幽
之照察老臣知退之心許上戎旃免司留鑰付之閑郡
息肩俾遂於少休顧此餘生沒齒難忘於再造臣無任

第四表

臣某言近三上表願上戎旃免司留鑰付之閑郡俾遂少休伏蒙聖慈特降詔書不允者罔功納節以疾請麾三嘗自陳一切未許行恐餘生之莫保敢千萬死以有聞臣某中謝伏念臣中實枵然生而戇甚寵榮欲報勇於遇事而輒為筋力既衰失在知難而未止比挾將顛之質疊傾必至之誠厚祿戒貪願止淮南之旄鉞小藩乞守免當河朔之喉襟尚未矜從尤激危懼蓋殘軀不息漸歸溝壑之為鄰空食寢深轉暴涓埃之無補伏望

皇帝陛下特回天聽俯徇物宜不遺螻蟻之微情各任
鷓鴣之常分有民人足以爲政畀支郡以養痾雖將相
許其辭隆絕公朝之假寵既完素守仍息久勞恩施難
名報償何有臣無任

第五表

臣某言近四上表以久疾不堪劇事到任已越三年願
納旄節就移邢相一郡伏蒙聖慈特降詔書不允者病
難任劇職合辭隆開可不時顛擠無日危迫敢殫於血

懇哀憐願軫於皇情臣某中謝伏念臣起自孤生初無
遠業祿常過量寵榮最早於他人福不勝災疾疹遂纏
於今日所以懇還將相之印力避兵民之權庶就閑州
少舒瘁質私計已決愚誠不移雖委寄誤深不謂三年
之已久而衰疲待報翻嗟一日之爲長矧是戎旃固非
虛器無功以領於義未安使老臣兩失於寸心豈仁主
曲全之本意伏望皇帝陛下特回天鑒俯遂物宜就更
麾符許上旄節驅馳駑足免令濱死以未休治養殘骸

或冀餘生之可保大恩難狀丹抱奚論

北京謝再任表

臣某言昨蒙聖慈差降中使齎賜勅告改授永興軍節度使判大名府再任尋累上章乞免換節制之命伏奉詔恩特允所乞仍別降勅再任者悃悞屢陳從欲許還於新節衰疲自力竭能勉撫於舊封委寄逾深顛擠是懼臣某中謝伏念臣本緣一介之曲學歷被三朝之誤知自解宰鈞繼紆守紱早年遇事風霜不計於殘軀晚

歲纏痾藥餌乃同於常膳比引搗躬之分數裁辭劇之章力旬間州少安病質而思生望外事與願違俄更西雍之帥旄尚付北門之留鑰所以極論去就仰贖聰明幸寵利非事君之宜必冀寢加恩之命策疲駑雖老臣可強敢不拜再任之休訖奉俞音兩諧愚懇此蓋伏遇皇帝陛下至仁天冒盛德海涵器使庶工愛偏舊物雖俊傑甚衆並試有爲之時而疴瘁之餘惜投無用之地敢不勤宣條教兼拊兵民儻溝壑之未填尚乾坤之可

報臣無任

判大名府再任滿乞郡第一表

臣某言臣間陳力不能者止斯善省躬非位而居曰貪
誠爲竊祿顧衰骸之難強加職事之不修重竭丹愚終
期軫惻臣某中謝伏念臣材資朽拙際會休明十稔近
司愧涓塵之無補一身多病嗟蒲柳之易衰向雖蒙均
逸之恩尋薦易極煩之地惟是北門之重正居中冀之
衝使傳交馳河防日急神識已昏而治紛拏之務筋力

已憊而躬應接之勞愈不自勝其誰見恤頃周三歲屢
叩九閭願還使節之榮復守鄉邦之舊螻蟻之誠斯至
冕旒之聽莫回黽勉弗安疋疲孰訴今茲再任實滿四
年戰兢而履冰淵粗能免過疾痛而呼父母豈不加憐
伏望皇帝陛下念犬馬之疹日深閔桑榆之景甚迫俯
矜危懇特示至仁許旄印之並收就里閭之差近俾更
偏郡以養殘軀公幹之卧漳濱稍延視息子牟之居海
上敢忘朝廷斯惟洪造之曲成雖盡餘生之曷報臣無

任

第二表

臣某言近上表以再任實滿四年多病不勝乞收旄印
就里閭之近改一偏郡以養衰殘伏蒙聖慈特賜詔書
不允者陳久疾以辭煩蓋申前請錫溫言而垂諭尚閔
俞音輒恃至仁再傾危懇臣某中謝伏念臣智能甚短
學術尤疎誤叨眷遇於三朝徒守朴忠之一節自勉當
於都會惟務罄於駕材疹積于中實覺不支於往日事

紛於外愈知難強於殘年故前後累形於封章而誠悃未蒙於省察况忝魏臺之寄四更堯歷之新一道之重而心不爲不勞連任於此而時不爲不久質於常典率皆受代而有期豈茲老臣獨使向隅而無訴伏望皇帝陛下推父母之深愛開日月之至明垂閔負薪之憂回照覆盆之下俾收使節退守偏州庶幾事簡而責輕少安悴質苟得氣完而神復可保餘生未填溝壑之間敢忘乾坤之報臣無任

第三表

臣某言近兩上表以再任滿久病乞納旄節就移近鄉
一郡伏蒙聖慈特遣中使賚賜詔書不允者屢引疾以
訴天願均勞而易地難動蓋高之聽未推從欲之仁罔
避譴誅必期矜允臣某中謝伏念臣本無他技偶對聖
時荷恩逾丘山之崇報國鮮涓塵之效向解鈞衡之重
欲蘇犬馬之疲素心忽戾於初終重寄尋更於西北昔
叨鄉郡優閑纔數月之間今任別都荏苒已四年之久

坐感歲時之易失，默傷齒髮之寢衰。况一支近感於風，攀顧積日可憂於殘廢。若使尚當於衝會，必將遽及於膏盲。伏望皇帝陛下察此哀鳴，出於至懇。卹晚塗之甚迫，閔朽質之增羸。未遺簪履之微，特軫冕旒之念。趣收印鉞，就假麾符。多病不能願效，汲生之治故鄉歸老。漸希疏傳之行，儻得遂於餘生。敢少忘於再造，臣無任

北京河決待罪表

臣某言大河所次全魏居衝苟先備之不嚴固守臣之

當咎臣某中謝伏念臣衰疲日甚寄任過優雖駑力之
強扶實病心之久耗惟茲經瀆爰設巨防於舊而無用
之間失預作不虞之計一罹淫雨遂致橫流矧此屬察
率皆盡瘁於耳目之難及素倚攸司在几按之所勤日
常不暇悉由臣恬無遠慮昏不過憂早圖營繕之方上
軫宵旰之念伏望皇帝陛下申明彝憲訓飭多方不徇
一臣之私恩而屈四海之公論特加竄絀以謝傷瘼其
本府通判職官等從來實不關預抹溢後來皆奔走救

扞備見夙夜用心乞並從寬貸臣獨甘重責無任

安陽集卷三十一

欽定四庫全書薈要卷一萬四千二百七集

安陽集卷三十二

宋 韓琦 撰

表狀

癸丑相州謝上表

臣某言奉勅差判相州軍州事已於今月六日到任上
訖別都再滿難力勉於殘軀故里三臨見恩殊於舊老
已班條教徧曉吏民既知聖君博愛之仁又慰前守復

來之望臣某中謝伏念臣孤忠少與他技非長荷累朝
含育之私玷上宰淵諧之久向辭鈞軸冀息衰疲會西
鄙之繹騷繼北方之震溢復當憂責莫遂安休補鄉邦屢
得於虛名領帥任通踰於再閏矧是鄴京之重素推朔部
之雄事執掌以裝懷殊無少間病纏綿而仍歲寢以不支
及茲當代之期輒露乞憐之訴願上節旄之過寵特更桑
梓之近州始錫溫言諭河內所留之意卒膺可詔有會稽
如請之行臣嘗考載籍之名臣記本朝之達宦凡得被典

城之寄幾何諧衣錦之榮如臣稠重振古稀凋展先冢而
松楸動色過里門而耆稚相歡此蓋伏遇皇帝陛下廣覆
無偏大明必照顧蟲魚之細尚唯恐於傷生况籌履之恩
固不忘於軫舊乃厚曲成之造俾延將盡之年敢不調養
病襟激昂老節不以鄉閭而為苟且之政不以疾疹而
幸尸素之安氣體遂完或可備國家之用筋骸益瘁即
當求田里之歸斯犬馬之所存在君親而何報臣無任

謝賜生日禮物表

臣某言伏蒙聖慈云云者親生在旦方萃感於已孤君
賜維時遽拜嘉而至渥寵榮所集震厲無從臣某中謝
伏念臣底滯天資迂踈時用特緣一介之術業歷脩三
朝之弼謨罄竭短才猶坐兼於袞鉞徘徊重祿未歸就
於田廬左弧第謹於私庭中詔忽傳於子舍衣頒內府
馬賜天閑韉葉有輝器文加鏤生而維翰實慙山甫之
降神今也所蒙又異桓榮之稽古此蓋伏遇皇帝陛下
愛深舊物禮厚孤臣垂記始生猥加異數敢不益殫篤

怯少荅龍光庶逃不稱之譏仍謹且乘之戒上恩既重
臣命愈輕臣無任

賀收復熙河等州表

臣某言伏聞熙河路經略司奏修復河岷等州百官稱
賀者隴外數州警天威而率順廷中百辟慶廟筭之惟
精凡在幅員畢同欣躍臣某中謝伏惟皇帝陛下雄材
大略高出前王偉蹟閔休負隆百代雖內修於文德亦
外闡於武功將帥得人闢國蓋踰於百里臣隣歸美舉

觴咸薦於萬年臣方守郡章阻陪朝著聽膚公之來上
知聖治之日新臣無任

謝放免勘劾相州差壯城兵士表

臣某言本州准樞密院劄子奉聖旨河北西路轉運司
近奏劾相州違條差壯城兵士往諸處收買修造物色
已差磁州通判季琮取勘並特放免者郡條紛冗難逃
誤失之愆使部按繩當坐曠隳之責特荷聖明之燭隱
遽從寬貸以推恩臣某中謝伏念臣氣劣早衰心疲易

耗自鄉閭之竊守嬰疾苦以彌年力不堪煩果自貽於
譴咎上猶加卹俄曲示於矜容此蓋伏遇皇帝陛下大
度淵深至仁天覆謂求諸小過則動觸於常刑故眷及
舊臣使衆知於優禮方願歸於畎畝敢少忘於國家臣
無任

甲寅秋乞致仕第一表

臣某言知足所以不辱道家之至言謝病豈必待年先
儒之高論顧宿痾之寢劇嗟悴質以難支欲逃瞰室之

災敢露乞骸之請臣某中謝伏念臣性資甚戇學術非長徒被眷於三朝悉叨榮於上宰力不勝任居懷覆餗之憂天責其盈常困負薪之疾屢剝由衷之奏獲從補外之行薦持西北之要權莫副朝廷之重寄向辭會府還守本邦垂組夸鄉固多榮耀息陰止影少幸安休而臣積恙有年良醫莫辨氣攻胃脇痛甚戈矛之所傷釁起膏肓理非藥石之能近苟尚貪於厚祿必遄喪於餘生伏望皇帝陛下特推天地之大恩俯念桑榆之末景

許上還於印綬俾退處於衡茅則臣得以釋去吏勞保
完神幹庶獲萬全之靈劑更施一溉之微功在則畝以
愛君敢忘忠國先犬馬而填壑是亦甘心儻賜矜從仍
乞只守本官致仕干冒旒宸臣無任

第二表

臣某言近以衰老多病上表乞守本官致仕伏蒙聖慈
特差中使賫賜詔書不允者弗瘳之疾固日極於疴疲
將盡之年竊自憐於光景願辭隆於將相得歸佚於林

泉未賜恩俞再祈軫惻臣某中謝竊以不能者止斯爲
量力之宜厥位惟危豈有苟安之理矧微生之寡祐感
竒瘵以難名當血氣之未衰尚任攻治逮筋骸之益瘁
莫可支持皆由臣曠責無慙冒榮不退天既惡其盈滿
鬼亦瞰乎高明致茲陰譴以何逃獨恃君仁而可訴伏
望皇帝陛下曲矜舊老俯照孤誠念臣如禮休官止有
二暮而甚近閔臣纏痾蒞事曾無一日之少安釋其絆
羈遂彼蒞菽許乞身於田里覬延命於朝昏漏盡而行

免貽譏於識者日入而息庶同樂於耕民使獲全於始
終惟永荷於仁聖臣無任

第三表

臣某言近以衰老多病兩上表乞守本官致仕伏蒙聖
慈特差中使齎賜詔書不允者竄漳之疾久已深根游
岱之魂日將去幹苟不嬰於職事得退伏於私居尚覲
衰殘稍延視息仰俞恩而未下幸哀訴以終憐臣某中
謝竊以千載逢時適其志者古實難偶萬鍾受祿患其

失者人之常情況臣丁全盛之期遇至仁之主爲郡處鄉閭之便忝官兼將相之榮豈不欲憑藉龍光留連富貴忍自投於閑寂甘取誚於昏愚蓋臣以疾苦支離力難勉強据疾顛之位既居常而弗安指告勞之年又將及而無幾歎崦嵫之漸迫陳悃愍以再殫痛甚而慈親莫聞誠至而高穹必動伏望皇帝陛下擴天地無垠之施閔冰炭不治之痾貸此餘齡矜其末路賜以安車之寵息茲駑駕之疲使朝廷有知止之臣足光聖政顧魚

鳥得遂生之樂免負慙顏臣無任

乙卯夏乞致仕第一表

臣某言臣聞祿者所以食功無功則謂之虛受力者以
其堪事廢事則謂之空官深惟二者之譏其實兼之已
久責雖未至誠豈能安願乞垂年之骸益隆善養之德
臣某中謝伏念臣資靈推鈍術業枵踈遭遇盛時徊翔
近列誤荷三朝之注意未嘗一事以辭難前迹具存大
明洞照去歲以久嬰疾恙日耗冲和意惰神昏肌銷骨

立屢拜章而告老庶得暇以營醫累錫詔音未容謝事
湛恩淪髓積媿叢心嗟薄祐之所鍾困宿痾之愈劇雖
牽強策勵不克支在公之役而語默動靜未曾忘曠職
之憂滿盈之屯晨夕可待况臣叨臨本郡已越再朞欲
宣力於要藩則支離而難強遂偷安於故里實尸素以
堪羞復去從心之年止餘周歲之近敢重干於天宸期
安退於田廬伏望皇帝陛下留聰明睿知之神廣徧覆
包涵之造俯察豚魚之懇垂矜蒲柳之衰亟推從欲之

仁俾遂歸休之請穀神閑境儻沉痼之有瘳肉骨餘齡
皆聖恩之所賜如允所請只乞以本官致仕干冒宸嚴
臣無任

第二表

臣某言近上表陳乞致仕伏蒙聖慈特差入內內侍省
內東頭供奉官勾當內東門司劉惟簡齋賜詔書不允
者衰年病久懇乞殘骸睿眷恩隆曲矜舊物閱俞音而
未下撫瘁質以何安再此冒聞終期得請臣某中謝竊

以享萬鍾之祿者人情之所戀被六極之疾者天譴之
有來蓋祿過者戀之不祥疾熾則來其示罰苟災生而
不避將鬼得以加誅而臣際會三朝周旋二府竊崇高
之位而出臨桑梓無尺寸之效以上報國家坐越再朞
日嬰宿疹里民為之指笑鄉老相與訾譏謂臣筋力已
疲既不可奮當繁劇鍾漏云迫又不能速丐安閑聆羣
議之交喧顧自容而無地于何逃責是必歸休伏望皇
帝陛下道廣照臨恩全終始閔老臣之無狀得危瘵而

弗瘳賜以餘齡遂其退節馳心黃屋寧忘魏闕之思訪
道赤松豈獨漢臣之幸臣無任

第三表

臣某言近上表陳乞致仕伏蒙聖慈特差入內內侍省
內東頭供奉官勾當內東門司梁從政齋賜詔書不允
及有殿直崔汝良押賜到制告勅牒各一道蒙恩改授
臣永興軍節度使令再任者老病不任方露乞骸之請
聖宸未諒俄蒙換節之留事絕戾於本心日不忘其自

處力當避免卒覲哀憐臣某中謝竊以君之御臣進退不可差於禮臣之守分去就不可失其宜故禮之差則非治國之大經宜之失則爲終身之至辱伏念臣久尸重祿常苦宿痾自叨任於安閑亦寢成於疴劣去歲以膏肓作癘寒暑交攻不惟皮骨之僅存固已精神之並耗屢乞歸休之適終沉賜可之音壹鬱奚伸昏冥愈甚此幸本邦之再歲輒申前懇而一言豈謂誠不上通恩非所望特易帥旄之重俾仍鄉郡之優雖陛下求舊之

私在一時而孰擬而愚臣要君之迹縱萬死以何明伏
望皇帝陛下監務燭微道先貴恕念辭榮而受寵理實
難安矜積疹以垂年許從謝去收其渙汗貸以餘齡使
一介之守不虧獲全終始則萬乘之仁至厚曷報生成
臣無任

安陽集卷三十二